

## **Rom kimbi Polnön Rom yenğöra kimbi alök. Jim-asa-asari**

Jim-asa-asari Rom sitinön kopa malgetka urumelen kambuñi kambuñi yenön sutñine simbisembel denđa malget. Juda tosatñan uruñini melenđa Juda ahakmemenön aka Köna keunön qekötahöba silenini yandiba sömbup qahö namba malget. Kian kantrigö urumelen kambu yenön Anutugö kalem möriamñi qekötahöba Anutugö Köna keu bapñe qahö anda söngöröqök aka siñgisöndok amqeba akingö mötket. (6.15) Anutunön Juda könagesö ölni andö enguba salupñine kian ambazip engoholi buñani akeri, miangöra söngaiba ilit engiget. (11.18-20) Mewö aka Juda urumelen yenön silikñini walñi mewöyök wuatangögerangöra aka jijiwilit ak engiba malget. Juda kambu yenön kian kantrigö urumelen alaurupñini qepureim engiba Juda silikñini qahö wuatangögerangöra aka keuñini töhören jim teköba söngöröqök aket. (2.17-20; 14.3)

Mindirim engimamğöra Polnön kambu yahöt yenğöra goro keu nanñök nanñök engimakza. Juda yenğö könani indeliga (2.21-27) kian kantri yenön söngaiget. Keu bohonñi kewö jiyök, ‘Jisös möt nariinga Anutunön mötnariñini eka keunini jim teköiga solanibin. Köna murutñi kun qahö ahöza.’ (1.17) Kian kantri ambazip söngöröqökñini qekömapköra könani indela kewö jiyök: “Anutunön nanñini ölöpñinanğöra

aka qahöpmö, nanñi ak-kömukömuñangöra aka inñini möwölöhöm enñiyök. (11.30-32) Mianğöra mönö kapañ köla Köna keu tem köla malme. (7.12-24) Körekmakörek siñgisöndokö kösö gwarönöñ mala ayuhubingö akzinmö, (3.23; 5.12) Anutunöñ nanñi irimsesewölñan etmapköra aka Kraist melaiyök. (5.8-9) Uña Töröñan meköba siñgisöndok aka kömupkö kukösumnöhök pösat neñgima. Mianğöra siñgisöndok ahakmeme mosöta (6.11-14) mindiriba jöpaköm añguba kopa yeñgö sutñine kopa tandök kude malme.” Goro mewö enñiiga ösöñösöñ tem köla mindiriba malget. Polnöñ nalö mutukñi Rom ani nañgöm wañgigetka toroqeba Spein kantrinöñ anmamgö möta mewö ohoyök.

**Buk kianğö bahöñi bohonñi 7 mi kewö:**

Jim asa-asari keu aka keu bohonñi 1.1-17

Köreknñan siñgisöndokö amötqeqegöra osizin 1.18-3.20

Anutunöñ amöt qem neñgimakzawañgö könani 3.21-4.25

Kraistpuk malmal dölökñangö könani 5.1-8.39

Israel yeñön Anutugö mötmöt areññöñ malje 9.1-11.36

Urumelenñ neñgö silik ahakmemegö keu 12.1-15.13

Keu teteköñi aka nanñi yaizökzök keuñi 15.14-16.27

<sup>1</sup> Pol ni Jisös Kraistkö nup meme azia aka Rom urumelenñ ambazip embuk keu eraum mötpingöra kaba kimbi ohozal. Anutunöñ noholiga melaimelai azi aposol akzal. Anutunöñ Ölöwak Buñani jim sehimangöra möwölöhöm niñgiiga maljal.

<sup>2</sup> Anutunöŋ oyaenƙoyaen akingö Ölöwak Buŋaŋi indelmapkö keuŋi mi qeljiŋe jöhöba jiiga kezapqetok ambazipnöŋ möta Buŋa Kimbi töröŋi mianğöreŋ ohogetka ahöza. <sup>3</sup> Ölöwak Buŋagö könaŋi mi nanŋi nahönŋi Jisös Kraist. Yaŋön gölme azi ewö kiŋ Deiwidkö gwölönarökurupŋi yeŋğöreŋök asuhuyök.

<sup>4</sup> Suep azi ewö Uŋaŋan solanŋi töröŋi ahök. Anutunöŋ i mem guliiga kömupnöhök wahoriga kukösumŋan aukŋe asuhuyök. Anutunöŋ mewö mianjön nanŋi Nahönŋi akzawaŋgö keuŋi mi jim köhöiba kuŋgum waŋgiyök. Kembuninaŋgö könaŋi mewö. <sup>5</sup> Kraistnöŋ nupkö öŋi kewö asuhumapköra mörök: Neŋön kian kantriŋi kantriŋi liliköba Jisösgö qetŋi sutŋine jim sehiinga möta uruŋini melenđa möt narim waŋgiba keuŋi tem köla malme. Mianğöra aposol nupŋi aka kalem möriamŋi mi neŋgiiga memba maljin. <sup>6</sup> Anutunöŋ ambazip Jisös Kraistkö buŋaya aka malmegöra eŋgoholöhi, Rom iŋini mewöyök yeŋgö sutŋine malje.

<sup>7</sup> Uruŋini melenđa Rom sitinöŋ maljei, nöŋön körek eŋğöra kimbi ki ohozal. Anutunöŋ iŋini nanŋi ambazip sarakŋi malmegöra eŋgohola jöpaköm eŋgimakza. Anutu Iwinini aka Kembu Jisös Kraist yetkön mönö kalem möriam eŋgiyohotka luainöŋ malme. Mewö köulukömakzal.

*Polnöŋ Anutu möpöseiba kewö köuluköyök:*

<sup>8</sup> Gölmeneŋi gölmeneŋi pakpak yeŋön Rom eŋgö mötnariŋinaŋgö kösohotŋi jigetka mörakzal. Mianğöra keuni könahiba Jisös Kraistnöŋ nam köl niŋgiiga körek eŋğöra aka Anutuni saiwap

jimakzal. <sup>9</sup> Nöñön mötmöt sihimni pakpak Anutugö nupnönj ala welenji qeba Nahönñangö Ölöwak Buñani jim asarimakzal. Mianğoreñ sundan injini mötmörim enğimakzali, mi Anutunönj nañğöba jimakza.

<sup>10</sup> Nalö dop kewö jiba köulukömakzal, “O Anutu, nöñön Rom yengöreñ anmamgö möta nalö köröñji lök mambötzal. Mianğöra mönö sihingahö dop jinöñga köna asuhuiga nalö kewöñe ölop anmam.” Mewö. <sup>11</sup> Enğeka mötnariñinan köhöimapköra möta ölop nup memegö mötmöt kalem kun enğimam. Mianğöra nalö mutukña enğoreñ kaba enğekñamgö awöwengöba maljal. <sup>12</sup> Kewö akingö awöwengömakzal: Nöñön enğekiga mutulañğöba ni aka injini denöwö möt narimakzini, mi eraum möta urunönj nañğöba körö-ölöwak qem añgubin.

<sup>13</sup> \*O urumelenj alaurupni, injini mönö kewö mötmöröiba malme: Nöñön kian kantri tosatñi yengö sutñine liliköba uruñini kuñgum enğibiga melenğeri, mianğö dop enğö sutñine mewöyök öñji asuhui ekñamgö mötzal. Mianğöra nalö gwötpuk lök enğoreñ kusuk kamamgö areñi ala malalmö, yuai tosatñan mönö nalöñi nalöñi jöhöm niñgiiga osial. <sup>14</sup> Anutugö jeñe tosa kewö ahöm niñgiza: Ambazip kambu könañi könañi bauköm enğimamañğö keuñan mönö nöñgö qakne ahöza. Mötmöt ambazip aka gukmaulem ambazip mienğö welenqeqeñini örörönj akzal. Mindimindiri keu Grik mötzei aka qandam \* mala nanñini keuñine iro-

---

\* **1:13:** Apo 19.21    \* **1:14:** Qandam, Siawari imbinönj qandak, Nei keunönj bus kanaka, ambazip arökñe nanñinök töñpin mala mötmöt mirinñini qahö gukmaulemnönj malget.

howaroho jimakzei, mi körek bauköm engimangö mötzal. <sup>15</sup> Mewö möta Ölöwak Buña mi Rom siti engöra mewöyök jim asarimangö amqeba urukönöp ahakzal. Mewö.

*Ölöwak Buñagö kukösumñi kewö:*

<sup>16</sup> \*Anutugö kukösumñan nini körek mem letot nenggiiga nalö kewöñe Suepkö buñaya akzin. Juda neñön mutuk urunini melenja mi möt nariin aka nengö andönine kantri tosatñi yeñön mewöyök mi möt nariget. Mianğöra Anutunöñ kukösumñi Ölöwak Buñanöñ ali ahözawañğöra mi algamusum qahö ahakzal. <sup>17</sup> \*Ölöwak Buñanöñ mönö solanñi akingö könani indelakza. Buña keu kun kewö ohoget ahöza, “Solanñi akzawi, yañön mönö Anutu möt nariba mewö mianğön köhöiba mal öngöma. Keu mianğö könani kewö: Nini Anutu könahiba möt nariinga mötnaripnini eka keunini jim teköiga solaniin aka gölmenöñ malbinangö dop toroqeba möt narim wañgiba jeñe solanimakin.” Mewö.

*Nengö siñgisöndoköra Anutugö irimñan seholidmakza.*

<sup>18</sup> Ölöp solanibinakmö, ambazip keu ölni ahakmemenjanan közañğöba siksauk memakzei, Anutunöñ mi Suepnöñ euyañ-göreñök uba ehi qahö dop köliga irimñi seholidmakza. Ambazip mewöñi pakpak engeka añğöjörakñini qetala silikñini bölöñğöra aka kazikñi indeli asuhumakza. <sup>19</sup> Mi kewögöra: Anutugö könani möt kutubinangö dop akzawi, mi mönö nanñak indel enggiiga sutnine aukñeyök ahöiga mörakze.

\* 1:16: Mak 8.38 \* 1:17: Hab 2.4

20 Anutugö malmalñi qahö ehakzinmö, kukösümñi mi Suep gölme miwikñaim etkiba mianğoreñök könahiba kondela mala koriga nalö teteköñi qahö asuhumakza. Mianğöra Anutugö börösöwöñi törörök ehinga bem aködamunñambuk akzawañgö könañan mönö ölöp möt kutubinañgö dop akza. Mianğöra ambazipnöñ yuai kunöñ möndöba nanñine keuñinañgö likepñi nañgöba jibingö osimakze. 21 \*Anutugö könañi möt kutuba malgetmö, töndup “Yañön bemnina,” mewö qahö jiba i qahö möpöseigetka qetbuñaji sutñine qahö ahöyök. Mewö qahö ahöyökmö, keu omanñi lanlan mötmörigetka mötmötñinan löwöriiga mötök aket. Uru mötkutukutuñini qahö mianñön mönö ömuñ köla pandaman meiga jipjap malje. Mianğöra “Anutugö könañi qahö mötzin,” jiba möndömöndö lan aketka qahö dop kölja.

22 “Mötkutukutu ambazip maljin,” jiba silenini memba öngöba malgetmö, mewö mianñön uruqahö ambazip akze. 23 \*Anutu qetbuñaji asakmararañambuk nalö teteköñi qahö mal öngömawi, i qahö möpöseiba waikñi qahö memba malgetmö, i mosöta salupñe tandö lopion aka imut tosatiñi kuñguget. Tandö lopion söhögetka kaisongolomñinan azi kömukömuñangö dop akze. Imut tosatiñi megetka nei sömbup aka gölmenöñ bapñinan köla ölölöngömakzei, mienğö dop akze. Yeñön mi sipköba bem ewö möpöseim enğiba malget.

24 Mewö aka malgerañgöra Anutunöñ i andö enğuiga nanñini uruñinañgö sihim kömbönañini

---

\* 1:21: Ef 4.17-18      \* 1:23: Dut 4.16-18

lan wuatangöba serowilin aka nannini silenini gamu qeba mem et al anguba malje. <sup>25</sup> Anutugö keu ölni mosöta salupne keu munenji qekötahöget. Miwimiwiknai Tonji ölna qahö göda qeba welenji qahö qeba malgetmö, yuai miwiknaiyöhi me nannini böröñinan megeri, mianjö sihimnji asuhui möta börösöwö mienjö waiknini memba möpöseim engiba malget. Mewö malgetmö, nenön miwimiwiknai Tonini mi nalö teteköñi qahö möpöseimakin. Keu mi ölna.

<sup>26</sup> Mewö aka malgerangöra Anutunöñ i andö enjuiga nannini sihim kömbönanjini gamunambuk mi lan wuatangöba kewö aket: Yengö ambiurupñinan awanöm köna diññi mosöta nanninak melenja amimba malget. <sup>27</sup> Azi yenön mewöyök ambibuk amimba malmal mosöta gonjiget. Kaisero akitkö sihim kömbönanjini mi azi sutñine öröm anguba mötketka könöpñambuk aiga nanninak melenja amimba angöjörakñinambuk aka malget. Gonjiba jaubatbat malgerangö likeñji mi Anutunöñ dopñine melenj enjiiga qakñine öngöiga böliget.

<sup>28</sup> Anutugö könani möt kutubingöra mötketka eretñi aiga mosötketka Anutunöñ mönö mewöñanök i andö enjuiga nannini mötmötñini gonjonan galöm köñ enjiiga ahakmeme gamunambuk aka memba malget. <sup>29</sup> Ahakmeme gonjonji aka silik bölöñi könani könani mianön urunini kokolak qeiga kewö ahakze: Yuaigö nepaqepalok membagun mbingö köpösöngöba isimkakalek ahakze. Tosatñi yengören yuaigöra körögisigisi ahakze. Ambazip enjuget kömumakze. Angururuk aka tosatñi tilipköm engimakze.

Ambazip tosatņi jiliwitiņ qakņe bōlōņi ak eņgibingō mōrakze. Keu ambazip kezapņine saņep alget geiga diwoņdawoņ anakza.

<sup>30</sup> Andōqeqe keu jimakze. Anutugō yom jimakze. Silik bōlōņi kōnōpņambuk tem kōla wuatangōmakze. Jakbak-ōraņbōraņ aka silenini memba wahōrakze. Silenōņ alal aka silik bōlōņi murutņi murutņi mi-wikņaimakze. Iwinam keuņini qahō tem kōlakze.

<sup>31</sup> Mōtmōtņini qahō tohoiga uruqahō mala keu laņ jōhōba qahō wuatangōmakze. Ala-ala qahō aka tosatņi yeņgōra wōsōmōtmōt qahō ak eņgimakze.

<sup>32</sup> Anutunōņ kōna diņdiņi kewō jim kutui ahōza: Ambazip bōlōņi mewōņi ahakzei, yeņōn mōnō kōmup kōhōikņangō buņaya akņeangō dop akze. Yeņōn jimkutukutu mi mōt asarizemō, tōndup nanņinak bōlōņi mi ahakze aka miyōk qahōpmō, tosatņan mewō aketka “Ölöp!” jiba imbi kōla naņgōm eņgimakze. Mewō.

## 2

*Anutunōņ keunini kewōta diņdiņanōk jim tekōmakza.*

<sup>1</sup> \*O alani, gi tosatņi yeņgō keuņini jim tekōmakzan me qahō? Gi tosatņi yeņgō keuņini jim tekōba nangak ahakmeme miyōhōk ahakzan. Mianģōra alagahō keuņi kun jim tekōzan ewō, mōnō nangahō keu mewōyōk jim tekōnōņa mianģō lōmbōtņan nangi qake öņgōma. Mianģōra öņgōņgōņi me eretņi akzani, mi tōndup mōnō yuai kunōņ mōndōba nangahō keugō likepņi naņgōba jimamģō osimakzan. <sup>2</sup> Ambazip ahakmeme

\* 2:1: Mat 7.1; Luk 6.37



bölöŋi mewöŋi ahakzei, Anutunöŋ yengö keuŋini keu ölnaŋgö dop kewöta jim tekömakza, mi mötzin.

<sup>3</sup> Mianğöra denöwö mötmörizan? Gi gölme azia aka töndup yuai mewöŋi ahakzei, yengö keuŋini jim teköba nangak ahakmeme miyöhök aknöŋga dop kölja me qahö? Anutunöŋ keugi kewöta jim teköba likepŋi melen gihiga ölna göhö qake öngöma. Anutugöra jeŋe qahö mömölaköba asambötman.

<sup>4</sup> Anutunöŋ ala ak nengiba bölöŋamninaŋgö likepŋi zilaŋ qahö melenmapmö, mamböta möta mökösoŋmakzawi, keu mianğöra jijiwilit akzan me? Anutunöŋ uruölöpŋi kondela urugi melenmangöra öröm gihimakzawi, mianğöra tönpin malbanbuk. <sup>5</sup> Gi kezapjupjup aka urugi qahö melenmani, mewö mianön Anutugö jeŋe qahö mömölakömanmö, irimsesewölŋan göhö qake sehiba öngöma. Kazik nalöŋan kam kuŋguiga keunini diŋdiŋanök jim teköma. Likepŋi melen nengimawi, nalö mianğoreŋ irimsesewölŋi mönö aukŋe indeliga eka mötpin.

<sup>6</sup> \*Anutunöŋ mönö “Ahakmemeninaŋgö dop mohot mohot nengöra likepŋi melen nengimawi,” mi kewö: <sup>7</sup> Anutunöŋ qetbuŋaŋi nengimapköra mamböta aködamuninambuk akingöra kapan köla pöndaŋ kinda nup ölöŋi ölöŋi memba maljini, nengöra malmal köhöikŋi nengima. Mi nengiga nalö teteköŋi qahö oyaenköyaen mal öngöbin. <sup>8</sup> Mewö mal öngöbinmö, ambazip nanŋinaŋgörök mötmöriba girinjabak memba Buŋa keu ölni andö qeba keu bölöŋi wuatanaŋgömakzei, Anutugö

---

\* 2:6: Sum 62.12; Qam 24.12

irimñan mönö miangöra seholiiga kazikñi ali qakñine öngöma. <sup>9</sup> Kazikñi mi mutuk Juda neñgö qakñine öngöiga neñgö andönine kantri tosatñi aiaka bölöñi ahakzei, körek yeñgö qakñine mewöyök öngöiga sihimbölö kahasililiñ möta malme.

<sup>10</sup> Mewö malmemö, Juda aka neñgö andönine kantri tosatñan mewöyök urunini melenđa aiaka ölöpnñi ahakzini, Anutugö aködamunñan mönö körek neñgö qakñine öngöiga qetbuña neñgiiga luainöñ malbin. <sup>11</sup> \*Anutunöñ ambazip tosatñi qahö neñgek soriba tosatñi qahö qepureim enjimakzapmö, dop mohotnöñ kewöt neñgimakza.

<sup>12</sup> Miangö könañi kewö: Kantri tosatñi yeñön Anutugöreñ Köna keu qahö oyoñda möta siñgisöndok lañ ahakzei, yeñön mönö körekñanök tönpin mala ayuhume. Juda neñön Anutugöreñ Köna keu oyoñda möta töndup siñgisöndok ahakzini, Anutunöñ mönö keu miangö dop körek kewöt neñgiba keunini jim teköma. <sup>13</sup> Ambazip Anutugöreñ Köna keu öne mörakzei, yeñön Anutugö jeñe solanñi qahö akze. Qahöpmö, Köna keu tem köla wuatañ-gömakzei, Anutunöñ mönö yeñgö keuñini jim teköiga solanize. <sup>14</sup> Kantri tosatñan Anutugöreñ Köna keu qahö memba maljemö, tosatñan töndup lañ nanñini imbi miangö dop mötmöriba ahakze. Anutugö köna keuñi qahö mötzmö, töndup mötmötñinan jim kutum enjiiga Anutugö köna keugö dop aka miangö bapñe malje.

<sup>15</sup> Mewö maljeangö könañi mi aukñe asuhuba kewö ahöza: Anutunöñ ambazip miwikñaim

---

\* 2:11: Dut 10.17

nenngiba mianğöreñ Köna keuñangö jimkutukutuñi mi körek nenngö urunine ali ahöza. Mianğöra Anutunöñ keuñi jiba sañep alakzawi, mi kian kantri yeñön mewöyök mörakze. Mi uruñinangö kezapñan mötketka keuñini jiiga Anutubuk öröröñ mörakze. Anutunöñ urumötmöt enngiyöhi, mianñön nalö tosatñe keu jakeñe ala kuñgum enngiiga möt bölimahakze aka nalö tosatñe keuñini nangöba jiiga möt ölöwahakze. <sup>16</sup> Ölöwak Buña jim asarimakzali, mianğö dop nalö ketañe kewö asuhuma: Kraist Jisösnöñ Anutu bauköm wanngiiga ambazip nenngöreñ keu tölapñi tölapñi kewöta jim teköm nenngima. Mewö.

*Köna keu mianñön könanamni denöwö indelja?*

<sup>17</sup> Gi nangi qetki Juda azia qeta Köna keunöñ amöt qem gihimapkö möt nariba “Anutugö buñaya akzal,” jiba silegi möpöseinöñga dop kölja me qahö? <sup>18</sup> Gi Anutugö jitñangö dop malmalgö keuñi möt sölöngöba maljan. Anutugö Köna keu kusum gihigerangöra aka köna qetpuk sorok wu-atangömangö jiba keu pakpak kewöta ölni aka munenji mendenmakzan. <sup>19</sup> Gi “Ölöp jegömöl ambazip alabaukñini aka ennguanngitmam,” jiba aiweliköm anngumakzan. Söñauptnöñ maljei, mi mem asarim enngimanangö dop awösamkakak akzan.

<sup>20</sup> Mewö aka kewö jimakzan, “Köna keu kusum ninngigetka mötkutukutu lök miwikñaiba keu ölnangö könanji mötzal.” Mewö jiba amqeba kewö jimakzan, “Ni ölöp ambazip mötmötniñi qahö yeñgö böhiñina akñam. Ölöp mönö namande yeñgö qaqañuñina aka kusum enngimakñam.” <sup>21</sup> Mewö jiba tosatñi kusum enngiba wuanöngöra nangi qahö

kusum anğumakzan? “Yonğorö kude meman,” jiba ambazip urunini kunğum enğimakzanmö, nangak yonğorö meme aknönğa qahö dop kölja.

<sup>22</sup> “Sero yonğorö kude aknan,” mewö jinön mötketka nangak kaisero akzan me qahö? Tandö lopion sisit mem enğimakzanmö, töndup nangak jöwöwöl jikenön öngöba yuaini anğön köla kiom qeba memakzan. Mi qahö dop kölja.

<sup>23</sup> Anutugören Köna keubuk maljananğöra silegi laj memba öngömakzanmö, nangak mi walönđa mewö mianön Anutugö qetbuñani memba et ala malnönğa gamuñambuk ahakza. <sup>24</sup> \*Mianğö keunji mi Buña Kimbinön kewö ohoget ahöza, “Enğö silikñinanğöra aka kian kantri könagesö yeñön Anutugö qetñi ilita sutñine mepaqepaik ahakze.”

<sup>25</sup> Anutugören Köna keu wuatangöba maljan ewö, Anutugö aiwesökñi silege yandigeri, mianön mönö bauköm gihiiga dop kölja. Mi dop köljamö, köna keu walönđa siñgisöndok ahakzan ewö, mönö aiwesöki qahö memeni mewö tandök aka öne laj maljan. <sup>26</sup> Tosatñan Anutugö aiwesökñi silenine qahö yandigetka töndup köna keugö jimkutukutunji wuatangömakze ewö, Anutunön aiwesök mi silenine ahözawangö dop ewö enğehiga dop kölja.

<sup>27</sup> Mewö enğehiga yeñğorenök kunñan ölop Köna keugö dop göhö keugi töhöññi kewöta jim teköiga etman. Anutugö aiwesökñi silege yandigetka Köna keugö bohonñi mohot mohot möt anğön köla maljanmö, mi walönđa siñgisöndok ahakzananğöra aka etman. <sup>28</sup> Azi kunñan silenöhök Juda azia akza ewö, yañön mönö Juda azi ölnji qahö akza.

---

\* 2:24: Ais 52.5

Mewöyök Anutugö aiwesökñi sileneyök yandigetka yaŋgiseŋ ahakze ewö, mi mönö aiwesök omaŋi, ölni qahö.

<sup>29</sup> \*Ölni qahöpmö, azi kun uruŋan Juda azia akzawi, yaŋön mönö Juda azi ölni akza. Mewöŋanök Anutunöŋ urunini qesöŋda Uŋaŋi Töröŋi mianğöreŋ ali maljawi, mianön mönö aiwesök ölni akza. Köna keugö bohonŋi wuatangöba azi silenŋi yandigetka gölme ambazipnöŋ mötketka öngömakzapmö, Anutunöŋ aiwesökñi urunine kinjawangöra möri öngöi möpöseim neŋgimakza. Mewö.

### 3

#### *Anutunöŋ keuŋi pöndaŋ wuatangömakza.*

<sup>1</sup> Mewö ahöiga Juda ambazip maljini, mianön mönö denöwö bauköm neŋgibawak? Anutugö aiwesökñi silenine yandigeri, mianğö ölnan mönö denöwö ahum neŋgiza? <sup>2</sup> Ölnan mönö malmal pakpak mianğöreŋ gwötpuk ahuba ölna bauköm neŋgimakza. Mianğö keuŋi mutukñi kewö: Anutunöŋ Buŋa keuŋi neŋgiiga buŋanina aiga maljin.

<sup>3</sup> Mewö maljinmö, neŋgöreŋök tosatŋan Anutu qahö möt narim wangiba malgetka denöwö ak eŋgima? Yaŋgiseŋ malgerangö likepñi melenđa mönö denöwö ak neŋgima? Urukalemñi jöhöba aŋgön köliga omaŋi akña me denöwö? <sup>4</sup> \*Mi qahöpmahöp! Nini körek pakpak muney ambazip akzinmö, Anutunöŋ öl töhöññi akza. Anutugö könaŋi mi Buŋa Kimbinöŋ kewö ohoget ahöza,

---

\* 2:29: Dut 30.6      \* 3:4: Sum 51.4

“Keu jakenje ala qesim gihigetka keugahö likepñi jim asariba mianğörej diñdñi aka luhut al enğiba kinman. Göhö kónañamgi mewö miwikñaiba nanğöba jime.”

<sup>5</sup> Neñön ahakmeme gonğoni wuatangöinga Anutunöñ qindñaim neñgiiga ahakmemeni diñdñan mewö aukñe asuhuza ewö, neñön keu mianğöra mönö denöwö jibinak? Ni keu mi gölme ambazip mötmötkö dop kewö jizal: Anutunöñ likepñi melenñiga irimsesewölñan qaknine öngözawi, yangö mötmötñan mewö gonğiza me qahö? <sup>6</sup> Qahö, mi yapmakek! Anutunöñ gonğoni akawak ewö, yañön gölmeñi gölmeñi neñgö keunini mönö denöwö kewöta törörök jim teköbawak?

<sup>7</sup> Nöñön munenñ azia akiga Anutunöñ keuñi öññan qindñaim niñgiiga yangö qetbuñañan mewö aukñe asuhum tiñgitza. Mewö aiga nöñön siñgisöndok ahali, Anutunöñ mianğö keuñi mönö denöwögöra jim teköza? Nömosöri nani imbi-imbi malbi dop kölbawak me qahö? Keuñan mönö qahö löwöriba etma. <sup>8</sup> Mönö kewö jiinga dop kölbawak, “Nini ölop bölöñi toroqeba ahinga Anutunöñ mi qindñaiiga ölopñangö öññan asuhuiga keuñan qetbuñañambuk akña.” Tosatñan neñgöra keu sirongen mewö jiba toroqeba kewö jimakze, “Polnöñ keu mewö jiba mianğö dop lañ ahakza.” Mewö aka jigerangö keuñi mi Anutunöñ kewöta dopñine jim teköm enğima, mötzal. Mewö.

*Ambazip kunñan solanñi qahö akza.*

<sup>9</sup> Keu mewö eraum möta mi denöwö jim teköbinak? Juda neñön kantri tosatñi enğonğita

Anutugö jeje diñdiñi akzin me qahö? Saumbañ! Mianğö keuñi lök qeljiñe kewö jim köhöinin: Juda me kantri tosatñi akinak, nini körekmakörek sinğisöndok ahinga köpeim nenğiiga maljin. Mianğöra silenini memba öngöbingö osimakzin.

10 \*Mianğö keuñi mi Buña Kimbinöñ kewö ohoget ahöza,

“Kunñan kun solanñi diñdiñi qahö kötökñi akza.

11 Kungö uruñe mötmöt qahö ahum kutui lañ malje. Kunñan kun Anutu miwikñaimangö qahö kapan kölakza.

12 Qahöpmö, körekñan mönö köna oñgita janjuñ aka malje.

Körekmakörekñan mönö böliba Anutugö jeje añğöjörakñinambuk akze. Ölöpnñi ahakzawi, mohot-töwa kun mi qahöpmahöp miwikñai zal.

13 \*Nesilamñinan isimkakalek ahakze.

Jöl ginaginañinan qaksirigö löm ewö añañiba kiniga kömupkö qösösökñi ewö mianğön ambazip lañ ayuhum eñgimakze. Keu bölöñi mi qatögö jitñi möröm warabe ewö numbuñine kokolak qeba ahöiga jitñinan ambazip lañ eñgöhömakze.

14 \*Sait keu kömbukñambuknöñ mönö numbuñini kokolak qeiga ambazip lañ qesuahöm eñgimakze.

15 \*Ambazip lañ eñguba sepñini mokomeğöra könañinan kik-kek ösumok anda kamakze.

---

\* 3:10: Sum 14.1-3; 53.1-3      \* 3:13: Sum 5.9; 140.3      \* 3:14: Sum 10.7      \* 3:15: Ais 59.7-8

- 16 Könañini gongii maljeaᅅgö aiwesökñini kewö akza: Denike lilikömakzei, mianᅅgöreñ mönö könden-mönden aketka ambazip uruñinan böliba kömbuhi-makza.
- 17 Luainöñ malmalgö könañi mi qahö möt kutum yaköze.
- 18 \*Anutu göda qebingö keuñi mi uruñine qahö ahöza. Jitñi oᅅgitpinbuköra keᅅgötñini qahö möta önewat lañ malje.”

Anutugöreñ keu mewö ahöza.

19 Anutunöñ Köna keu kewögöra neᅅgiyök, mi mötzin: Köna keu pakpak mianᅅn gölme dop jöhöm neᅅgimakza. Nini keu mianᅅgö bapñe anda tem köla malinga dop kölma. Qahö tem kölbin ewö, Anutunöñ mönö likepñi melen neᅅgii ayuhubin. Mianᅅgöra sömbunini möta möndömöndönini mosöta keu bök mala tem köl waᅅgiinga dop kölma. Anutunöñ ambazip könanini mewö indelöha ahöza.

20 \*Köna keunöñ jöhöm neᅅgimakzapmö, nini lökñanök mi wuatᅅgöbingö osimakzin. Anutugöreñ Köna keunöñ siᅅgisöndok qiwikñaiiga aukñe eka ölop möt kutubimö, köna mianᅅn Anutugö jeñe solanñi akingö osibin. Mewö.

*Solanñi akingö könañi mi mötnariᅅ.*

21 Naninak osimakzinmö, Anutunöñ Köna keu wuatᅅgöba solanñi akingöra mi qahö jiyökmö, köna murutñi kewö areᅅgöba jii ahöza: Anutunöñ nanñak keunini jim teköiga yaᅅgö jeñe solanibin. Anutunöñ keu mi Moses aka kezapqetok ambazip yeᅅgöra indeliga naᅅgöba jiba Buña Kimbinöñ ohogetka nalö kewöñe aukñe asuhuiga mötzin.

\* 3:18: Sum 36.1      \* 3:20: Sum 143.2; Gal 2.16



<sup>22</sup> \*Miaṅgöra denike denike neṅön Jisös Kraist môt narizini, Anutunöṅ mönö körek neṅgö keunini jim teköiga solanibin. Ambazip kambu murutṅi murutṅi neṅön Anutugö jeṅe öröröṅ akzin. <sup>23</sup> Ambazip körek neṅön siṅgisöndok aka Anutugö asakmararaṅgöra osizin.

<sup>24</sup> Mi osizinmö, Anutugö kalem möriamṅan asuhuiga Kraist Jisösnöṅ sohopnini meyoḱ. Anutunöṅ kalem miaṅgöra aka keunini jim teköiga solanibin. <sup>25</sup> Mutuk siṅgisöndok aka malgeri, Anutunöṅ mi möta mökösoṅda likepṅi zilaṅ qahö melenṅ eṅgiyoḱ. Mi qahö melenṅ eṅgiba nanṅi ahakmeme solanṅan aukṅe asuhumapköra möta Kraist Jisös jöwöwöl sömbup ewö aliga qeget kömuiga Anutugö jeṅe köl könjörat neṅgimapkö könaṅa ahök. Sepṅi mokoyöhi, mi môt nariinga mewö miaṅön siṅgisöndoknini mosöri solanibin. <sup>26</sup> Könaṅi mi nalö kewöṅe aukṅe asuhumapköra möta Jisös mewö ak waṅgiyoḱ. Anutugö ahakmeme solanṅi mi kewö: Nanṅak solanṅi akza aka kunṅan Jisös môt narizawi, mönö yaṅgö keuṅi jim teköiga solanimakza.

<sup>27</sup> Mewö aiga mönö wanigöra silenini mem öṅgöbinak? Yuai kungöra aka qahöpmahöp. Köna keu wuatṅgöba solanṅi akingöra mi osizin. Mewö solanṅi qahö akinmö, Jisös môt nariinga Anutunöṅ neṅgeka keunini jim teköiga solanimakin. <sup>28</sup> Keu ki jim teköba köṅṅi kewö jim köhöizin: Köna keu wuatṅgömakzinṅgöra qahöpmö, Jisös môt narim waṅgizinaṅgöra aka Anutunöṅ keunini jim teköiga solanimakin. <sup>29</sup> Anutunöṅ Juda neṅgö

---

\* 3:22: Gal 2.16

Anutuninanök qahö akza. Mönö kantri tosatñi yeñgö Anutuñina mewöyök akza me qahö? Mönö yeñgö Anutuñina mohot akza.

<sup>30</sup> \*Anutunöñ mohot akza. Mianğöra silenini yandiget maljini, neñön möt narim wañgiinga mem solanim neñgimakza aka silenini qahö yandiget maljei, mi mewöyök möt narim wañgigeranğöra aka mem solanim eñgimakza. <sup>31</sup> Mötnarimegö keu jiba mianjön kuñgum eñgiba mewö mianjön Köna keu memba et alinga omanji akña me qahö? Mi yapmakek qahöpmö, Anutugöreñ Köna keu mi qahö qeapkömakzinmö, mi mem köhöimakzin. Mewö.

## 4

### *Abrahamnöñ Anutu möt nariba solanñi ahök.*

<sup>1</sup> Nini bömöñ jalönini Abrahamgö könañanğöra denöwö jibin? Yañön Anutugö könañi denöwö miwikñaiba yañgö jeñe solanñi ahök? <sup>2</sup> Ölña, Anutunöñ yañgö keuñi ahakmemeñi ölopñanğöra aka jim teköiga solanibawak ewö, yañön mianğöra ölop silenji memba öñgöbawakmö, mi Anutugö jeñe qahö. <sup>3</sup> \*Mianğö keuñi Buña Kimbinöñ kewö ohoget ahöza, “Abrahamnöñ Anutu möt nari-iga mötnaripñi ehi dop köliga keuñi jim teköiga solaniyök.” Keu mewö ahöza.

<sup>4</sup> Keuñi mönö kalema jim teköiga solaniyökmö, kunñan nup meiga galömñan töwañi kalema qahöpmö, nup memakzawañgö dop ek kewöta töwañi wañgimakza. <sup>5</sup> Gölme galömnöñ mewö wañgimakzaptmö, Anutunöñ anğöjörak ambazip

\* **3:30:** Dut 6.4; Gal 3.20      \* **4:3:** Jen 15.6; Gal 3.6

neŋgö keunini jim teköiga solanimakin. Miangöra kunŋan oyaenŋkoyaen akŋangöra nup qahö memba Anutu öne möt narim waŋgizawi, Anutunöŋ mönö mötnaripŋi mi ehi dop köliga keuŋi jim teköiga solanima.

<sup>6</sup> Deiwidnöŋ mewöyök keu miangö könaŋi naŋgöba keu kewö indela jiyök, “Kunŋan oyaenŋkoyaen akŋangöra nup qahö meiga Anutunöŋ mötnaripŋi ehi dop köliga keuŋi jim teköiga solanizawi, yaŋön mönö simbawoŋ akza.”

<sup>7</sup>\*Mewö jiiga keuŋi mi kewö ohoget ahöza, “Ambazip Köna keu walöŋgetka Anutunöŋ siŋgisöndokŋini mosöta köl könjörari maljei, yeŋön mönö simbawoŋ akze.

<sup>8</sup> Kembunöŋ kungö siŋgisöndokŋi saŋgoŋda ehi dop köliga likepŋi qakŋe qahö ali öŋgömawi, yaŋön mönö oyaenŋkoyaen akza.”

Keu mewö ahöza.

<sup>9</sup> Anutunöŋ oyaenŋkoyaen akingö könaŋi mewö indela Anutugö aiwesökkninambuk neŋgörök jii ahöza me qahö? Mi qahö. Mi mönö kantri tosatŋi aiwesökŋini qahö yeŋgöra mewöyök ahöza. Neŋön lök kewö jiba ohozin, “Abrahamnöŋ Anutu möt nariiga mötnaripŋi ehi dop köliga keuŋi jim teköiga solaniyök.”

<sup>10</sup> Mönö wani nalönöŋ ehi dop köliga keuŋi jim teköiga solaniyök? Anutugö aiwesökŋi silene yandiget malöhi, nalö miangöreŋ qahöpmö, mutuk öne malöhi, Anutunöŋ mönö nalö miangöreŋ mötnaripŋi ehi dop köliga keuŋi jim teköiga solaniyök.

---

\* 4:7: Sum 32.1-2

11 \*Mutuk öne mala Anutu möt nariiga keunji jim teköiga solaniyök. Miangö andöñe dop köljawanğö aiwesökñi mi silene yandimegöra jiiga munğem supap ewö ahök. Mewö aiga yangö andöñe Anutugö aiwesökñinambuk qahö mala möt narim wanğiinga mötnaripñini ehi dop köliga keunini jim teköiga solanibini, Abrahamñöñ körek neñgö bömön jalönina ahök. 12 Bömön jalönini yanön öne mala nalö mianğöreñ urunji melenđa Anutu möt nariba malöhi, nini aiwesökñinambuk yangö dop aka maljin. Anutugö aiwesökñinambuk mala urunini melenđa maljini, mönö neñgö bömönina mewöyök ahök. Aiwesök yandim neñgigetka öne lañ qahö maljinmö, Abrahamğö köna lasupñi wu-atangöba möt narimakzin. Mewö.

*Anutugö jöhöjöhö keu möt nariinga öljambuk akña.*

13 \*Anutunöñ Abraham gölme buña qem wanğiiga tonji aiga gwölönarökurupñan yangö andöñe mewö mal öngömegö keunji jiba jöhöyök. Keu mi Köna keu wuatangöyöhanğöra aka qahö jiyökmö, Anutunöñ mötnaripñi ehi dop köliga keunji jim teköi solanji ahöhanğöra keu mi jiyök.

14 \*Tosatñan oyaenğoyaen akingöra Köna keunöñ qekötahöba mewö mianön Anutugöreñ yuai mi buña qem anğubeak ewö, yeñön mönö möt naribingö keunji qeapkögetka omani akawak. Mewö Anutugö jöhöjöhö keugöra qahö osiinga keu mi-anön omani akapuk. 15 Anutugöreñ Köna keu walönninga irimñi seholiiga kazikñan qaknine

---

\* 4:11: Jen 17.10    \* 4:13: Jen 17.4-6; 22.17-18; Gal 3.29    \* 4:14: Gal 3.18

öngömakzapmö, Köna keu qahö ahöbawak, mewö sinjisöndokö keunji qahö jibinak.

16 \*Abrahamnöη mewö mindirim nenjiba körek nenjö bömöni akza. Mianğöra jöhöjöhö keunji nenjiyöhi, mi Köna keunöη qekötahömakzei, yenğörök qahöpmö, Abraham ahök ewö möt narimakzini, nenjöreη mewöyök ölnambuk akñapköra mörök. Mianğöra Anutunöη jöhöjöhö keunji mi kewö arengöba alök: Mi möt nariinga ölnji körek nenjöra kalema nenjiiga kalem möriamñan aukñe asuhumakza.

17 \*Abrahamgö keunji kun mi Buña Kimbinöη kewö ohoget ahöza, “Nöñön gi kuñgum gihibiga ambazip könagesö gwötpuk yenjö iwiñina akñan.” Keu mianğö dop Abrahamnöη Anutugö jeñe iwi ak nenjimakza. Anutunöη kömukömunji mem gulim enjimakza. Könagesö malmalñini qahö, mi jebuk maljeañgö tandök ewö enğoholi asuhumakze. Abrahamnöη mönö Anutu mewöñi möt narim wañgiyök.

18 \*Anutunöη mutuk Abrahamgöra kewö jii mörök, “Göhö gwölönarökurupkan ahum sehigetka jañgöñini senğelau ewö aiga malme.” Jöhöjöhö keu mi möta denöwö ölnambuk asuhubawak, mi qahö mörökmö, mi töndup jörömqöröm aka ambazip könagesö gwötpuk yenjö iwiñini akñamgö mamböta malök. Jöhöjöhö keu mutukñañgö dop asuhumapköra mönö Anutu möt narim wañgiba malök. 19 \*Saragö köröñan morö memegö dop qahö aiga nanñak yambuñi lök 100:kö dop ahök.

---

\* 4:16: Gal 3.7    \* 4:17: Jen 17.5    \* 4:18: Jen 15.5    \* 4:19: Jen 17.17

Miaṅgöra nanṅi mötmöriiga lök azi namṅi silenṅi waziba sohosoholiṅi ahökmö, töndup Anutugörenṅ keunöṅ ölnambuk akṅapköra möt narim waṅgiba maliga Abrahamgö mötnariṅṅan qahö sörauba löwöriyök.

<sup>20</sup> Qahö löwöriyökmö, keuṅṅan ölnambuk akṅapkö möt nariba miaṅgörenṅ köhöiba kinök. Anutugö jöhöjöhö keugöra uruṅṅan an qem kam qem uruyahöt qahö ahökmö, mötnariṅṅan köhöiiga Anutu möpöseiba maliga Anutugö qetbuṅṅan sehiyök. <sup>21</sup> Anutunöṅ yuai asuhumapkö keuṅṅi jiba jöhöba mi ak tekömamgö köhöimakzawi, mi möt köhöim teköba uruyahöt kun qahö aka malök. <sup>22</sup> Mewö aka malöhaṅgöra Anutunöṅ Abrahamgö mötnariṅṅi ehi dop köliga keuṅṅi jim teköiga solaniyök. <sup>23</sup> Mötnariṅṅi ehi dop köliga keuṅṅi jim teköiga solaniyöhi, keu mi Abrahamgörök qahö ohoget ahöza.

<sup>24</sup> Abrahamgörök qahöpmö, neṅgöra aka mewöyök mi ohoget ahöza. Nini Kembunini Jisös mem guli kömupnöhök wahöröhi, Anutu ia möt narim waṅgiinga mötnariṅṅini ehi dop köliga jim teköm neṅgiiga solanibin. <sup>25</sup> \*Anutunöṅ neṅgö siṅgisöndok-ninaṅgöra aka Jisös qahö aṅgön köli kömuyök aka solanṅi akingöra aka mem guliiga kömupnöhök wahöta malja. Mewö.

## 5

### *Anutugö jeṅe solaniba söṅgaiba luainöṅ maljin.*

<sup>1</sup> Neṅön Anutu möt nariṅga keunini jim teköiga solanizin. Miaṅgöra Kembunini Jisös Kraistnöṅ

---

\* 4:25: Ais 53.4-5

mönö nam köl neŋgiiga Anutubuk luai miwikŋaiba maljin. <sup>2</sup> Mewöyök Jisös Kraist möt nariinga nam köl neŋgiiga kalem möriam buŋa qem aŋgubingö könaŋi miwikŋaiba nalö kewöŋe kalem möriam uruŋe maljin. Anutugö asakmararaŋ uruŋe aŋgotpingö jörömqöröm aka söŋgaimakzin.

<sup>3</sup> Mianğörök qahö söŋgaimakzinmö, wahöjalıŋ möta mianğöra mewöyök söŋgaimakzin. Köŋjiliŋ möta mököşöŋda mewö mianğön kapaŋkölköl miwikŋaibin. Mi möta mianğöra söŋgaimakzin.

<sup>4</sup> Kapaŋkölköl miwikŋaiba esapesapnöŋ köhöiba kinbin. Esapesap-nöŋ köhöiba kininga jörömqörömninan köhöimakŋa. <sup>5</sup> Anutunöŋ Uŋa Töröŋi al neŋgiiga köna asuhuiga urukalemŋi mokoiga urunine geiga maljin. Mianğöra jörömqöröm aka oyaenŋkoyaen akingö al mamböta gamumamusum qahö miwikŋaibin.

<sup>6</sup> Mianğö könaŋi kewö: Nini mutuk lölöwöröŋi ösumnini qahö malini, Kraistnöŋ mönö nalö diŋdiŋi mianğöreŋök kömumba ambazip aŋğöjörakninambuk neŋgö sohpnini meyök.

<sup>7</sup> Kunöŋ Köna keu törörök wuatangöba diŋdiŋi akzawi, ala mewöŋangöra kunŋan ölop qahö kömumbawak? Mi möriğa osibawakmö, kunöŋ urukalem gwötpuk ambazip ak eŋgimakzawi, alaŋi kunŋan yaŋğöra aka ölop silenŋi köleŋda kömumamgö mötpawak.

<sup>8</sup> Ambazipnöŋ mewö ahakzinmö, Anutunöŋ uruŋan jöpaköm neŋgimakzawi, yaŋön mi kewö kondelök: Yaŋön Kraist melaiiga eta mutuk aŋğöjörak ambazip malini, nalö mianğöreŋök mönö neŋğöra aka kömuyök. <sup>9</sup> Kömuiga nalö

kewöŋe sepŋan sanŋonɗa jim teköm neŋgiiga solaniba maljin. Töndup mi korembenji ewö aiga ölnjan mönö könanŋep kewö asuhuma: Anutunöŋ ŋiŋgisön-dokö urukönöpŋi aukŋe kondeliga yuai kanjamŋambuk gölmenöŋ asuhuma. Mi asuhuiga Anutugö jeŋe solanŋi akzinanŋöra Jisösnöŋ mönö jeŋberereŋ mianŋöreŋök meköm neŋgiiga oyaenŋkoyaenŋ akin.

<sup>10</sup> Nini mutuk Anutugö kerökurupŋi malini, nalö mianŋöreŋ nanŋi Nahönŋi melaii kömumba mianŋön töwanini ahiga Anutubuk ala-ala ahin. Ahini, mianŋön korembenji akzapmö, ölnji bohonŋan könanŋep kewö asuhuma: Töwanini ali Anutugö alaurupŋi malinga Jisösnöŋ köhöiba maljananŋöra mönö amqeba meköm neŋgiiga oyaenŋkoyaenŋ akin. <sup>11</sup> Kembunini Jisösnöŋ Anutugö amötqeqe nupŋi meiga Anutunöŋ töwanini ali yambuk ala-ala ahini, miyöhök qahöpmö, ölnja Anutubuk jöpaköm anŋuba kindä köiraŋ köla söŋgaimakzin. Mewö.

*Adamgöra aka köhömuŋi akzinmö, Kraistköra aka gulibin.*

<sup>12</sup> \*Azi mohotnöŋ ŋiŋgisöndok gölmenöŋ kondoriga asuhuyök. Anutunöŋ ŋiŋgisöndok mianŋö likepŋi aliga kömup asuhuyök. Mianŋö dop ambazip körek neŋön ŋiŋgisöndok aka malinga kömupnöŋ mianŋöra ambazip körek pakpak dop köl neŋgii maljin. <sup>13</sup> Mutuk Köna keu qahö asuhuiga nalö mianŋöreŋ mewöyök ŋiŋgisöndok lök aukŋe asuhuba ahöyökmö, Köna keu qahö

---

\* 5:12: Jen 3.6



ahöiga siŋgisöndokö keuŋi mi qahö jim kewöta laŋ malget.

<sup>14</sup> Adamgö nalöneyök könahiba laŋ mala kotketka Mosesgö nalöŋe Köna keu asuhuyök. Ambazip nalö sutŋe miangören siŋgisöndok aketmö, Adamnön köna walöŋnöhi, miangö dowök qahö walöŋda malgetmö, kömupnön töndup i mewöyök galöm köl enġii malget.

Adam, azi mutukŋi yaŋön mönö azi kun kamawangö söpsöpŋa ahök.

<sup>15</sup> Söpsöpŋa ahökmö, könaŋiri mi örörön qahö akzahot. Adamnön Köna keu walöŋda eri siŋgisöndok asuhum sehiba ambazip gwötpuk dop köl enġiiga kömumba malget. Mi kömupkö könaŋi akzapmö, oyaenköyaen akingö könaŋi mi kun. Mi kewö: Azi mohot Jisös Kraist yaŋön nam köl nenġiba kalem möriamŋi indeliga Anutugö kalemŋan aukŋe asuhiba ambazip gwötpuk dop köla qesalöpköm nenġiyök. <sup>16</sup> Toroqeba kewö jimam: Köna yahöt mi örörön qahö akzahot. Azi mohotnön siŋgisöndok aiga Anutunön keuŋi jim teköiga siŋgisöndok ambazip körek neŋön könöp siagö buŋaya akzin. Mi gölme azigö könaŋi akzapmö, Suep azigö könaŋi mi kun. Mi kewö: Nalö gwötpuk Anutugö Köna keu walöŋninga kalemŋi kondela jim teköm nenġiiga solanimakzin.

<sup>17</sup> Mi dumge jimam: Azi mohotnön Köna keu walöŋda kömup kondoriga ambazip körekmakörek kömumba maljin. Adamgö siŋgisöndoköra aka kömupnön körek dop köla galöm köl nenġii laŋ malin. Mi köna etqeŋeŋi akzapmö, Anutu ösummumuŋaŋgö könaŋi mi kewö: Ambazip nini solanŋi

akingö kalemñi mi kelenmalelen buña qem aŋguba kalem möriamñanğö uruñe maljini, neñön mönö oyaenköyaen akin. Azi mohot Jisös Kraist yañön nanğöba inahöm nenğiiga suahö \*

<sup>18</sup> Dumge kunbuk jimam: Azi mohotnön Anutugö Köna keu walönđa eri Anutunön keuñi jim teköiga ambazip körek neñön könöp siagö buñaya ahin. Mewöñanök azi kunñan solanñi akingö kondoriga urunini melenñinga Anutunön ölop ambazip pakpak nenğö keunini jim teköiga solaniba köhöiba mal öngöbin. <sup>19</sup> Dumge kunbuk kewö jimam: Azi mohotnön qeçetal aka siŋgisöndok bohon köli sehiiga ambazip sehiseñi neñön melenđa siŋgisöndok ambazip ahin. Mewöñanök azi kunñan Anutugö jitñi tem köla siŋgisöndokninañğö töwañi aliga köna asuhuiga Anutunön ambazip sehiseñi nenğö keunini jim teköiga solanibin.

<sup>20</sup> Mutuk öne lañ mala kotketmö, Mosesgö nalöñe Anutunön Köna keu ambazip siŋgisöndokñini möt kutumegöra toroqem enğiyök. Mi toroqem enğiyökmö, mi mötketka siŋgisöndokñinan sehiba aukñe asuhuyök. Mewö aiga Anutunön mönö kalem möriamñi mewöyök mem sehiiga siŋgisöndok onğita asuhuyök. <sup>21</sup> Siŋgisöndökö kukösumñi mi ketañi. Mianğöra siŋgisöndok ahinga mianön galöm köl nenğiiga köhömuñi mala kömumba mala korin. Anutugö kalem möriamñi mianön mönö mewöñanök kukösumñambuk akza. Jisös Kraist Kembuninan

---

\* **5:17:** Jembon onji nene (Siawari keunön qariwe ilikñi nene) ewö köhöiba mal öngöbin.' ewö köhöiba mal öngöbin.

solanibingö kondoriga Anutunöŋ keunini jim teköiga diŋgiba malmal köhöikŋi miwikŋaiba nalö teteköŋi qahö mal öŋgöbin. Mewö.

## 6

*Sinġisöndok andö qeba Kraistpuk guliba malme.*

<sup>1</sup> Anutunöŋ kalem möriamŋi neŋġi sehimapköra sinġisöndok toroqeba aka malbin me qahö? Miaŋgöra mönö denöwö jiinga dop kölma?

<sup>2</sup> Sinġisöndok yapmakek! Nini sinġisöndokö kösönöhök lolohoba urunini walŋan qamöt ewö aiga sinġisöndok akingö tököba maljin ewö, mönö denöwögöra sinġisöndoknöŋ toroqeba galöm köl neŋġi malbinak?

<sup>3</sup> Keu ki mötze me qahö: Nini körek Kraistkören qeköta-höbingöra aka o melun mem neŋġiget. Miaŋgoren urunini walŋan mönö Jisös qeget kömuyöhaŋgö tandök kömui malbingöra o melun mi mem neŋġiget.

<sup>4</sup> \*Iwinöŋ asakmararaŋi kondela Kraist mem gulii kömupnöhök wahöröhi, neŋgö uruninan mewöyök kölöŋaiiga dölökŋi aka malinga dop kölma. Iwininan nini Kraistkö tandök ewö guliba wahöta ahakmeme dölökŋi aka memba malbingöra mötza. Miaŋgöra o melun mi kewögöra mem neŋġiget: Urunini walŋan Jisösbuk mohotŋe kömumba ahömapköra urunini walŋi mi mewö löm kölget.

<sup>5</sup> Urunini walŋan Kraistpuk öröröŋ kömui miaŋgoren yambuk qekötahöba maljin ewö, Iwininan nini mewöyök Kraistpuk kinbingöra

---

\* 6:4: Kol 2.12

mötza. Kraistnöŋ kömupnöhök wahöröhi, mönö yangö tandök öröröŋ guliba malinga dop kölma. <sup>6</sup> Urusilegö sihim kömbönaŋnini bölöŋan siŋgisöndok akingö köpösöŋgömakzawi, Anutunöŋ sihim mi köndeŋni gemapköra mörakza. Anutunöŋ siŋgisöndoknöŋ toroqeba galöm köl neŋgii welenŋi qeba malbinbuköra mötza. Miaŋgöra urunini walŋi mi Kraistpuk maripomnöŋ lök qeiga kömuyök. Miaŋgö dop maljin, mi mötzin.

<sup>7</sup> Kungö uruŋi walŋan kömuiga yaŋön mönö siŋgisöndokö kösönöhök lolohoba malja. <sup>8</sup> Urunini walŋan Kraistpuk kömuyök ewö, mewöŋanök yambuk guliba mal köhöibingö möt narizin.

<sup>9</sup> Mewö möt nariba Kraistkö könaŋi kewö ahöi möt yaközin: Anutunöŋ i mem gulii kömupnöhök wahöta mal köhöiba kunbuk qahö kömuma. Kömupnöŋ i qahö toroqeba galöm köliga mal öŋgöma. <sup>10</sup> Kömup kömuyöhi, mewö miaŋön mönö nalö mohot miaŋgöreŋ siŋgisöndokö kukösumŋi köndeŋniga nalö teteköŋi qahö lölöwöröŋi ahöm öŋgöma. Malmal köhöikŋi maljawi, mi mönö Anutugöra mala mal öŋgöma. <sup>11</sup> Qamötnöŋ siŋgisöndok akingö osime. Inini mönö mewöŋanök nanŋinaŋgö mötketka qamöt ewö aiga Kraist Jisösbuk qekötahöba kinda Anutugöra köhöiba malme.

<sup>12</sup> Silenŋini kömumawi, miaŋgö sihim kömbönaŋi bölöŋan galöm köl eŋgiiga i tem köl waŋgiba siŋgisöndok akepuköra mi mönö jöhöba malme.

<sup>13</sup> Miaŋgöra sile kitipŋini pakpak mi mönö siŋgisöndok Tonŋgö böröŋe kude alme. Mala mewö algetka buŋaŋi aiga bohon köliga aŋgöjörak asuhubapuk. Mewö qahöpmö, köhömuŋeyök

gulibagun mönö nannini Anutu tököm wanjime. Sile kitipnini pakpak mi Anutugö böröñe algetka buñani aiga bohon köliga ahakmeme solanji asuhumakña. <sup>14</sup> Injini Köna keu bapñe qahöpmö, kalem möriam uruñe malje. Mianğöra singisöndoknön mönö öne jöhöba galöm köl enğii malbepuk. Mewö.

*Solanji malmalgö Tonji welen qeba malme.*

<sup>15</sup> Mianğöra denöwö jibinak? Nini Köna keu bapñe qahöpmö, kalem möriam uruñe mala singisöndok ahinga dop kölja me qahö? Mi yapmakek! <sup>16</sup> To yahöt akzahot. Nannini yetköreñök kungö böröñe al anguba jitñi tem köla welenni qemakzei, mianğöra mönö keu ki möt yaköme: Injini kun jitñi tem kölakzei, mönö yanğö welenqequeurupñi akze. Singisöndok Tonangö welenqequeurupñi akze ewö, yanön mönö enğuanğiriga kömum köhöime. Anutugö jitñi tem köla welenni qemakze ewö, yanön mönö keunini jim teköiga solanji aka mal öngöme.

<sup>17</sup> Injini mutuk singisöndok Tonangö welenqequeurupñi aka malget. Mewö malgetka Buña keu mindingöm enğimakñapköra kusum enğigetka mötket. Mi möta mianğö dop uruñini melenđa nalö kewöñe Buña keu törörök tem köla Anutugö könani wuatangömakze. Mewö möta enğöra “Anutu saiwap!” jiba maljin. <sup>18</sup> Mi wuatangöba singisöndokö kösönöhök lolohoba Anutugö welenni qeba ahakmeme solanji aka memba malje.

<sup>19</sup> Urusilenjanan lölöwöröñi akzawanğöra aka keu mianğö könani mi mönö gölme ambazip nengö keu jijigö dop nöñön kewö jimam: Injini mutuk sile

kitipņini pakpak tōkōba iwilele Toņangō (Satangō) bōrōņe ala welenni qeba malget. Mewō malgetka ahakmeme aņģōjōrakņambuk asuhuiga uruņinan tōlōhoi malget. Mewō malgetmō, nalō kewōņe sile kitipņini pakpak mi mōnō tōkōba Anutugō bōrōņe alme. Mewō ala welenni qegetka ahakmeme solanņi asuhuiga sarakņi ahakņe.

<sup>20</sup> Inņini singisōndok Toņangō welenqequeurupņi malgeri, nalō mianģōreņ ahakmeme solanņi mi qahō wuatangōgetmō, nanņini imbi-imbi laņ malget. <sup>21</sup> Nalō kewōņe ahakmeme mianģōra gamuņini mōtzemō, nalō mianģōreņ mewō aka mala ōlņi mōnō denōwō miwikņaiget? Ahakmeme gamuņambuk mianģō ōlņi mi kōmup kōhōikņi.

<sup>22</sup> Nalō kewōņe Anutunōņ singisōndokō kōsōnōhōk pōsat eņgiiga lolohoba Anutugō welenqequeurupņi aketka ōlņi asuhuiga sarakņi ahakze. Mewō aka malmal kōhōikņi mala tetekōņe oyaeņkoyaeņ aka mal ōņģōme. <sup>23</sup> Singisōndok ahinga Toņan tōwa neņgiiga kōmup kōhōikņi miwikņaiabinmō, Anutugō kalemņi mi oyaeņkoyaeņ malmal. Kraist Jisōs Kembuninambuk qekōtahōba kinbin ewō, mōnō kōhōiba tetekōņi qahō mal ōņģōbin. Mewō.

## 7

### *Awanōm malmalgō sōpsōp keu*

<sup>1</sup> O urumelen alaurupņi, inņini Kōna keu mōtzeangō dop eņģōra kewō jimam: Kōna keunōņ ambazip jōhōm neņgiza. Gōlmenōņ mal ōņģōbinangō dop mōnō mianģō bapņe malbin, inņini mi mōtze me qahō? <sup>2</sup> Mianģō sōpsōpņi kun

kewö: Köna keunöŋ ambi apŋambuk jöhöiga azinöŋ malmawanğö dop awanöm malmahotmö, apŋan kömuma ewö, anömŋan mönö awanöm malmalgö Köna keunöhök lolohoma.

<sup>3</sup> Mianğöra apŋan jebuk maliga azi kungöra On! jiiga mema ewö, yangö qetŋi mönö qesabulum ambia jimakzin. Mewö jimakzinmö, apŋan kömuma ewö, Köna keu mianjön qahö toroqeba jöhöi malma. Mewö mala azi kun memawi, yaŋön mönö qesabulum ambia qahö akŋa.

<sup>4</sup> Mianğöra urumelenj alaurupni, enğö könaŋamŋinan mönö mewöŋanök ahöza. Inini mewöyök azi kungö buŋaŋi akŋegöra Kraistpuk qekötahöget. Anutunöŋ i mem gulli kömupnöhök wahöriga malmalninan öŋi Anutugöra miwikŋaii asuhumapköra mörakza. Kraistnöŋ kömuiga uruŋini walŋan yambuk kömuiga qamöt ewö aka Köna keugö buŋaŋi qahö malje. <sup>5</sup> Mutuk urusilegö sihim kömbönaŋi bölöŋan galöm köl neŋgiiga laŋ malin. Nalö mianğöreŋ Köna keunöŋ sölölöhöba kuŋgum neŋgiiga siŋgisöndok akingö sihim kömbönaŋnini bölöŋan asuhum tiŋgita galöm köl neŋgiget. Mianğöra urusileninan wahöriga malmalninan kömup köhöikŋaŋgö öŋi miwikŋaiba laŋ malin.

<sup>6</sup> Mewö malinmö, mutuk keu mianjön jöhöm neŋgiiga gwaröŋe mala köna keugö bohonŋi mohot mohot wuatangöbingö kapan köla nupŋi memba malin. Kraistpuk qekötahöba kininga urunini walŋan yambuk kömuiga nalö kewöŋe köna keugö buŋa ahinaŋgöreŋök lolohoba kunbuk welenŋi qahö qemakzin. Nalö kewöŋe könaŋamninan

kölönaiiga Uña Töröñan inahöm neñgiiga amqeba Anutugö nupñi memakzin. Mewö.

*Singisöndok akinbukö kapañ köla aum-mörimakzin.*

<sup>7</sup> \*Miañgöra denöwö jibinak? Köna keu nanñak singisöndok-ñambuk akza me qahö? Mi yapmakek! Köna keunöñ mönö singisöndokö könañi kondel niñgiiga möral. Köna keu kun kewö ahöza, “Kungöreñ yuaigöra kude köpösöngöman.” Mewö qahö jibawak ewö, nöñön yuaigö köpösöngömakzali, miañgö könañi qahö möt kutubilenak. Miañgöra Köna keu qahö möt kutubilenak, mewö singisöndok qahö möt yaköbilenak.

<sup>8</sup> Köna keu qahö ahöbawak, singisöndoknöñ mönö keu omanñi aka köhömuñi akawak. Mewö akawakmö, jöjöpañ keu mötpiga sel jöhöm niñgiiga mi walöñmamañgö könañi ahuiga singisöndok aki asuhuyök. Jöjöpañ keunöñ mönö kuñgum niñgiiga urunan wahöriña sihim kömbönañi bölöñi könañi könañi asuhum tiñgitketka bölöñañgöra lañ köpösöngömakzal. <sup>9</sup> Mutuk Köna keu qahö möta tönpin malalmö, jöjöpañ keu mötpiga mianön anğön köl niñgiyöhañgöra singisöndokö sihimnan guliiga urunan wahöri mi ahal. Singisöndok akiga mem kömum niñgiiga köhömuñi ahal.

<sup>10</sup> Anutunöñ jöjöpañ keu mi wuatangöba mal köhöimamgöra aka al niñgiyökmö, keu mi wuatangömamgö esapköbiga mem kömum niñgiiga köhömuñi ahal. Köhömuñi ahali, mianön mönö aukñe asuhui miwikñaijal. <sup>11</sup> \*Jöjöpañ keu möt

\* 7:7: Eks 20.17; Dut 5.21      \* 7:11: Jen 3.13



kutubiga sel jöhöm ningiiga mi walönmamanğö kōnaŋi ahui jöjopaŋ keunöŋ kuŋgum ningiiga siŋgisöndoknöŋ tilipkōm ningiiga mi ahal. Siŋgisöndok aka keunambuk ahal. Mewö mianjōn Anutugö jöjopaŋ keu mianjōn siŋgisöndok bohon köliga aki mem kömum ningiiga köhömuŋi ahal.

<sup>12</sup> Mewö ahalmö, tōndup Köna keu mianjōn mönō kömbukŋi aka sarakŋi akza. Mianğö jöjopaŋ keuŋan mönō diŋdiŋi aka ölöŋŋi akza. <sup>13</sup> Mewö aiga jöjopaŋ keu ölöŋŋi mianjōn mem kömum ningiiga köhömuŋi ahal me qahö? Mi yapmakek! Keu ölöŋŋan qahöpmö, Köna keunöŋ mönō nani siŋgisöndoknağö kōnaŋi indeli möt kutuyal. Siŋgisöndokö gamuŋi aukŋe asuhui kanjamŋambuk mötmamğöra aka jöjopaŋ keu mianjōn siŋgisöndokö selŋi jöhöiga urunan wahöri walönda siŋgisöndok ahal. Nani siŋgisöndokni mianjōn mönō mem kömum ningiiga köhömuŋi ahal. Mewö.

*Urone siŋgisöndokö yarö ahöi maljal.*

<sup>14</sup> Uŋa Töröŋan Köna keu neŋgiiga diŋdiŋi akzawi, mi mötzinmö, nöŋön siŋgisöndok azia aka sihim kömbōnaŋni bölöŋambuk akzal. Eta kölbiga siŋgisöndoknöŋ galöm köl ningiiga tem köla welenŋi qeba siŋgisöndok ahakzal.

<sup>15</sup> \*Mianğöra yuai ölöŋŋi akŋamğö mörakzali, mi qahö ahakzal. Mimö, yuai bölöŋi akŋamğö tököba sisitŋi memakzali, mönō mia ahakzal. Mianğöra yuai ahakzali, nöŋön mianğö kōnaŋi ölöŋ qahö möt kutumakzal. <sup>16</sup> Mianğöra yuai bölöŋi akŋamğö ölan aka mia ahakzal ewö, Köna keunöŋ mönō tōndup ölöŋŋi akza. Köna keugöra mönō urumohot akzal.

---

\* 7:15: Gal 5:17

17 Mewö aiga nöñön nanak mi qahö toroqeba ahakzalmö, siñgisöndok urune ahözawañön mönö kuñgum niñgiiga mi ahakzal. 18 Ahakmeme ölöpnji akñamgö sihimñji ölna mörakzalmö, mi akñamgö ösumnan qahö asuhum niñgimakza. Miangöra nöngö urune yuai ölöpnji kun qahö ahözapmö, urusilenan mönö siñgisöndok akñamgö kuñgum niñgimakza, mewö mötzal. 19 Miangöra yuai ölöpnji akñamgö sihimñji mörakzali, mia qahö ahakzalmö, yuai bölöñji qahö akñamgö mörakzali, mönö mia ahakzal. 20 Mewö aiga yuai akñamgö tökömakzali, mia töndup ahakzal ewö, mi nanak qahö toroqeba ahakzalmö, siñgisöndok urune ahözawañön mönö kuñgum niñgiiga mia ahakzal.

21 Miangöra nani könani kewö ahöi miwikñaimakzal: Yuai ölöpnji akñamgö sihimñji mötpiga bölöñangö sihimñjan mönö uruni jöhöiga qakömakzal. 22 Miangö könani kewö: Uruneyök göröken Anutugöreñ Köna keugöra urumohot aka tem kölmamgö mörakzal.

23 Mewö mörakzalmö, sileneyök göröken nani könanamni kewö ahöi miwikñaimakzal: Silenangö kitipñji mienñön siñgisöndokö bohonñji aketka akñamgö mörakzal. Siñgisöndok akñamgö sihimnan mönö urusihimni ölöpnji mi memba et almapköra möri auba yarö qemakzahot. Siñgisöndok akñamgö sihim kömbönañnan mönö silenangö kitipñji kitipñji sölölohöm engiba jöhöm niñgiiga kösö gwarönöñ maljal. 24 O nöñön bölim teköba angöjöraknambuk akzal. Urusilenangö sihimñji bölöñan noangiri kömup köhöikñji kömumbilenñbuköra mönö dañön sohopni memba amöt qem niñgibawak?

25 O Jisös Kraist Kembuni, mönö yambuk nam köla “Anutu saiwap!” jizal. Könañamnan mewö aiga nanak urunanöhök Anutugörej Köna keugö bapņe anda welenņi qemakzalmö, sileni siņgisöndokņambuk miangören göröken siņgisöndok akņamgö sihim kömbönañnan jöhöm niņgiiga miangö kösö gwarönöñ maljal. Mewö.

## 8

*Uña Töröñan tim töndanini aiga mal köhöizin.*

<sup>1</sup> Miangöra ambazip Kraist Jisösbuk qekötahöba kinjini, Anutunöñ mönö neņgö keunini jim teköiga nalö kewöñe könöp siagö buña qahö aka maljin.

<sup>2</sup> Miangö könañi kewö: Gi siņgisöndokö sihimņi tem köla malnöñaņgöra aka kömup köhöik-ñaņgö buņaya aka malnöñ. Mewö malnöñmö, Kraist Jisösbuk qekötahöba kinöñga malmal köhöikñaņgö Uñañan mönö kömup köhöikñaņgö kösönöhök pösat gihiiga maljan.

<sup>3</sup> Ambazip urusilenine sihim kömbönañnini bölöñi mi ahöza. Mi wuatangöinga Köna keugö ösumñan löwöriba malmal köhöikņi neņgimapkö osiiga qaköin. Qaköba urusileninan siņgisöndok aka malini, Anutunöñ siņgisöndok miangö keuņi jim teköba likeņņi kewö melenök: Yañön nanņi Nahönņi melaiiiga gölmenöñ eta siņgisöndok azigö sile tandök ahök. Toroqeba siņgisöndokö jöwöwöl tandök ewö aiga ohogetka kömuyök. Anutunöñ malmal köhöikñaņgö könañi mewö mesarök.

<sup>4</sup> Anutunöñ könañi mi kewögöra mesarök: Köna keunöñ nini solanņi aka diņdiņi malbingöra jim kutum neņgimakzawi, Anutunöñ keu

mianğö ölğan nenğörej asuhum tekömapkora mörök. Mianğöra nini urusileninağö sihim kömbönañnini bölöñi wuatangöbingö tököba Uña Töröñağörej nağöba jitsihitñi wuatangöba ahakzin. <sup>5</sup> Ambazip urusileninağö sihim kömbönañi bölöñi wuatangömakzei, yeñgö uruñinan mönö siñgisöndökörej göröken akingö ahöza. Ambazip Uña Töröñağörej nağöba jitsihitñi wuatangöba ahakzini, nenğö uruninan mönö Uña Töröñağörej göröken akingö ahöza. <sup>6</sup> Urusileninağö sihim kömbönañnini bölöñan mönö öröm nenğiiga kömup köhöik-ñağörej anbingöra ahözapmö, Uña Töröñan urunine luai qeiga mal köhöibingö sihimñi mörakza.

<sup>7</sup> Anutunöñ Köna keu nenğiiga siñgisöndök akingö sihim kömbönañninan mönö keu mianğö bapñe qahö anakza. Mi anmamğö osiza. Mi osiiga lañ mala uruninan Anutu qetala kerök ak wañgimakzin. <sup>8</sup> Ambazip urusilegö sihim kömbönañinan galöm köl eñgigetka lañ maljei, yeñön mönö Anutugö jeñe dop kölbingö jiiga qaköme.

<sup>9</sup> Yeñön qakömemö, Anutugö Uña Töröñan eñgö uruñine malja ewö, yeñön mönö galöm köl eñgi malje. Urusilegö sihim kömbönañini bölöñi mienjön mönö inini qahö galöm köl eñgimakze. Kraistkö Uña Töröñan kungö uruñe qahö geiga öne maljawi, yeñön Kraistkö buñañi qahö akza. <sup>10</sup> Qahö akzapmö, Kraistnöñ eñgö uruñine malja ewö, sileninan siñgisöndököra aka kömumemö, uñañinan solanñi akzeañgöra aka mal köhöim

öngöme. <sup>11</sup> \*Anutunöŋ Kraist Jisös mem gulii kömupnöhök wahöröhi, yanğö Uŋaŋan uruŋine malja ewö, yetkön inini Anutubuk qekötahöba kingetka sileŋini köhömuŋi mi mewöyök mem gulimahot.

<sup>12</sup> O urumelenj alaurupni, guliba maljinanğöra neŋön mönö Anutugörenj tosabuk maljin. Urusilegö sihim kömbönaŋnini bölöŋi wuatangöbinanğö tosaŋi qahöpmö, Uŋa Töröŋanğö jitŋi tem köla malbingö tosaŋan mönö ahöm neŋgiza. Mianğöra nanini imbi-imbi laŋ malbinbuk. <sup>13</sup> Urusilegö sihim kömbönaŋnini bölöŋi wuatangöba malje ewö, inini mönö kömup köhöikŋanğö buŋaya akŋe. Mewö akŋemö, Anutugö köulukögetka Uŋa Töröŋan urusilenjananğö ahakmeme bölöŋi mem kömumakŋa ewö, mewö mianğön mönö guliba mal köhöiba malme. <sup>14</sup> Anutugö Uŋaŋan ambazip enğuanğiri maljei, yeŋön körek Anutugö nahönböraturupŋi akze.

<sup>15</sup> \*\*Ömewöröme yeŋön ambazip sölölohöm enğigetka jönömŋini undui welenqeŋe omaŋi aka maljemö, inini öme mewöŋi mia kun qahöpmö, Uŋa Töröŋi i buŋa qem anğuba malje. Mianğöra inini mönö kunbuk toroqeba keŋgöt qakŋe malbepuk. Uŋa Töröŋi yanğön mönö mem letot enğiiga Anutugö nahönböraturupŋi akze. Uŋa mianğön sölölohöm neŋgiiga Anutugöra “Aba <sup>\*</sup> <sup>16</sup> Anutugö nahönböraturupŋi akzini, keu mi Uŋa Töröŋan nanŋak nanini uŋaninambuk imbi köla mohotŋe nanğöba jimakzahot.

---

\* **8:11:** 1 Kor 3.16    \* **8:15:** Mak 14.36; Gal 4.6    \* **8:15:** Gal 4.5-7    \* **8:15:** Aba mi Arameik keunöŋ iwi.' Iwini!' qerakzin.

<sup>17</sup> Anutugö nahönböraturupñi akzin ewö, yañön nanñi ambazipurupñi neñgöra oyaenköyaen mözözömgöi ahözawi, mi mewöyök buña qem anğubin. Anutunöñ Kraistköra yuai mözözöm-göi ahözawi, mi mönö mewöyök Kraistkö qöhöröñe kinda buña qem anğubin. Kraistpuk mohotñe sihimbölö mörakzin ewö, mönö mewöyök Kraistkö asakmararaññöñ öñgöba yambuk mohotñe asariba malbin. Mewö.

*Malmal asakmararañambuknöñ öñgöba malbin.*

<sup>18</sup> Nalö kewöñe sihimbölö möta maljini, mianñön malmal eretñi akza. Könañgep Kraistkö asakmararaññöñ öñgöba asariba oyaenköyaen malbini, mianñön mönö malmal öñgöñgöñi aködamunñambuk akña. Malmal yahöt mi likeplikep ala kewötpinañgö dop qahö. Mewö mötmörizal. <sup>19</sup> Anutunöñ sömbup aka yuai pakpak miwikñaiyöha ahözei, mienñön mönö mamböta Kraistnöñ kaba Anutugö nahönböraturupñi meköba kondel enğiiga asakmararañ asuhum enğimapköra awöweñgömakze.

<sup>20</sup> \*Anutunöñ sömbup aka yuai pakpak miwikñaiyökmö, mienñön mala kömumba ayapköme. Nanñini sihimñinañgö dop qahöpmö, Anutunöñ mönö nanñi sihimñañgö dop mewö areñgöyök. Yuai pakpak ayapkömemö, töndup jörömqöröm enğiiga oyaenköyaen kewö asuhumapköra al mambörakze: <sup>21</sup> Anutunöñ sömbup aka yuai pakpak miwikñaiyöha ahözei, mienñön mönö mewöyök kewögöra mambörakze: Anutunöñ i mewöyök anğöjörak malmalgö kösöñeyök pösat enğiiga qahö kömumba gisahöba

---

\* 8:20: Jen 3.17-19

ayapkömömö, Anutugö nahönbörat ewö lolohoba asakmararajinambuk asariba ahöm öngöme.

<sup>22</sup> Mianğö könaji kewö: Anutunöŋ sömbup aka yuai pakpak miwikŋaiyöha ahözei, mienön körek pakpak mönö mohotŋe osongom köla morö memegö masö tandök möta ahöba kota nalö kewöŋe mewöyök ahakze. Mi mötzin.

<sup>23</sup> \*Anutunöŋ sömbup aka yuai pakpak miwikŋaiyöha ahözei, mienönöhök qahöpmö, Anutugö yambu jeŋiqeŋe ahinga Uŋaji kalema neŋgii maljini, neŋön mönö mewöyök uruninan osongom köla maljin. Anutunöŋ neŋguanğiri nahönböratuŋi qainŋi kun akingö mamböta mala osongom ahakzin. Neŋguanğita sile sohpnini meiga kunbuk letotpingöra awöweŋgöba maljin.

<sup>24</sup> Mewö letotpingö jörömqöröm aka urunini melenđa Suepkö buŋaya ahin. Yuaigöra jörömqöröm ahakzini, mianğö ölni asuhui ehinga jörömqörömnini mewö mianön teköma. Kunöŋ kun yuaigö ölni asuhui eka mianğö jörömqörömŋi mi qahö toroqeba aka mambörakza. Mi qahö.

<sup>25</sup> Yuaigö ölnan qahö asuhui ehakzini, mianğöra jörömqöröm akzin ewö, mi mönö kapan köla asuhumapköra al mamböriŋa uruninan qahö erakza.

<sup>26</sup> Mewöŋanök löwöriŋa Uŋa Töröŋan bauköm neŋgimakza. Denöwö köuluköiŋa dop kölbawak, mi qahö mötzinmö, Uŋa Töröŋan mönö nanŋak köuluk nupnine bauköm neŋgiba neŋgöra aka köuluköba keu jitŋi aukŋe qahöpmö, osongom aka

---

\* 8:23: 2 Kor 5.2-4

saŋepnönj alakza. <sup>27</sup> Saŋepnönj ala Anutugö jitsihitŋaŋgö dop ambazip sarakŋi neŋgöra aka köulukömakza. Anutunönj ambazip urunini ek kewörakzawi, yaŋön mönö amqeba Uŋa Töröŋaŋgö uru mötmötŋi mörakza.

<sup>28</sup> Anutunönj köulukŋi möta öröyuai pakpak galöm köliga miangö mindimindiri ölŋan mönö nanŋi alaurupŋan ölöwakŋegöra asuhumakza. Mi mötzin. Ölŋi mianön ambazip amötqeŋe areŋaŋgö dop eŋgoholi jöpaköm waŋgimakzei, mönö i mewö me mewö bauköm eŋgimakza. <sup>29</sup> Anutugö areŋaŋgö könaŋi kewö: Nanŋi nahönŋan urumelen alaurup sehisehiŋi neŋgö sutnine mutuknini ak neŋgimapköra mörakza. Miangöra qeljiŋe areŋ ala nini tandökninan Nahönŋaŋgö dop akingöra mörök. Miangöra ambazip qeljiŋe möt neŋgiyöhi, nini mewöyök mewö akingöra jim möwölöhöm neŋgiyök. <sup>30</sup> Qeljiŋe jim möwölöhöm neŋgiyöhi, nini mewöyök neŋgoholök. Neŋgoholöhi, neŋgö keunini mewöyök jim teköiga solaniin. Solaniini, neŋgöra mewöyök köna kondeliga nanŋe asakmararaŋnönj öŋgöba oyaenköyaen akin. Mewö.

*Anutugö urukalemŋaŋgö möpömöpösei liŋet.*

<sup>31</sup> Keu mi möta miangöra denöwö jibinak? Anutunönj sel jöhöm neŋgiba likepnine malja ewö, daŋön mönö qetal neŋgibawak? <sup>32</sup> Anutunönj nanŋi Nahönŋi tok qahö aŋgön kölökmö, i jim teköiga malmalŋi körek neŋgöra aka köleŋnök. Mi köleŋniga Anutunönj yambuk kalem korembenji tosatŋi pakpak mi mewöyök amqeba neŋgima.



<sup>33</sup> Anutunöŋ ambazip nanŋaŋgöra möwölöhöm neŋgiba keunini jim teköiga solanimakzini, miangöra danön mönö keu jakeŋe al neŋgibawak?

<sup>34</sup> Kraist Jisösnöŋ kömuiga Anutunöŋ kunbuk mem guliiga Suepnöŋ öngöba Anutugö böröŋi ölŋe tata toroqeba neŋgöra aka köulukömakza. Miangöra kunŋan kun keunini kewöta könöp sianöŋ gebingöra jim teköm neŋgimangö osima.

<sup>35</sup> Kraistkö urukalem uruŋe malinga danön mönö miangöreŋök menden neŋgiiga etpinak? Kahasililiŋ ak neŋgigetka wahöjaliŋ mötpinakmö, Kraistkö urukalemŋeyök ölop qahö etpin. Sese-werowero ak neŋgibeakmö, miangöreŋök ölop qahö etpin. Bödi akinak me opo söröninan qahöwahi malbinak, mönö ölop qahö etpin. Kömumbinbukö keŋgöt qakŋe malbinak me yarö gilgetka kazik asuhubawakmö, mönö ölop qahö etpin. <sup>36</sup> \*Miangö keuŋi Buŋa Kimbinöŋ kewö ohoget ahöza,

“Nalö dop söŋanök könahiba kömumbingöra neŋgugetka anda mala suŋgem ahakza. Lamaya eŋgum nembinaŋgörök maljei, neŋgöra miangö tandök mötmörimakze.”

<sup>37</sup> Keu miangö dop ak neŋgibeakmö, Kraistnöŋ urukalemŋi indeli mörini, yaŋön töngum neŋgiiga lömböt pakpak miangöreŋ mönö luhut ala köiraŋ köla malbin. <sup>38</sup> Yuai kunöŋ mönö Kraistkö urukalemŋeyök menden neŋgimangö osima. Mi öl töhöŋŋa möt yaközal. Kömupnöŋ me malmalgö yuaini kunöŋ mönö menden neŋgimangö osima. Suep garata me ömewöröme yeŋön mönö nalö

---

\* 8:36: Sum 44.22

kewöŋe me könangep nini menden nengibingö osime. Bem suahö kukösumŋinambuk yeŋön mi osime.

<sup>39</sup> Euyangö euŋe me emuyangö emuŋe maljei, yeŋön mönö menden nengibingö osime. Anutunöŋ öröyuai tosatŋi kun miwikŋaiyöha ahözei, mienön mönö mewöyök Anutugö urukalem miangörenök menden nengibingö osime. Anutugö urukalemŋi miangön mönö Kraist Jisös Kembunini yangören asuhui indeli, mi mötzin. Mewö.

## 9

*Anutunöŋ sihimŋangö dop Israel möwölöhöm enŋiyök.*

<sup>1</sup> Nöŋön Kraistpuk qekötahöba kinda munen keu qahöpmö, keu öl töhöŋŋi kun jimam. Uŋa Töröŋangö keugöra kezap albi keuni nangöba jim köhöiba saŋep urune ali kewö möta jizal: <sup>2</sup> Nöŋön Juda ambazip tosatŋi yeŋgö wösöbirikŋinan nunŋuiga urunan sihimbölö ketanŋi teteköŋi qahö kewögöra mörakzal:

<sup>3</sup> Yeŋön nömbuk gölme silenöŋ Israel könagesöya mohot akzinmö, uruŋinan Kraistpuk qahö qekötahöba laŋ malje. Nöŋön Israel alaumurupnan uruŋini melenmegöra aum-mörimakzal. Anutunöŋ yeŋgö keuŋini kewöriga nanak yeŋgö salupŋini akiga likepŋi melen da nöŋgö qakne kewö öŋgömapkö mötzal: Yeŋön ni Kraistkörenök menden niŋgii könöp siagö buŋaya akŋamgö mötzal.

<sup>4</sup> \*Yeŋön Israel kambu uruŋe malgetka Anutunöŋ enŋuanŋiri buŋanŋi akze. Anutugö

---

\* 9:4: Eks 9.4

qetbuŋaŋi bisiba aködämunŋinambuk akze. Anutunöŋ yembuk oyaenŋkoyaen akingö jöhöjöhö walŋi aka dölökŋi aka Köna keuŋi al engiyök. Miangöra jöwöwöl jikenöŋ öngöba Anutugö waikŋi memba möpöseimakze. Anutunöŋ kötümötuetŋi sehimapkö keu jöhöyöhi, miangö ölnan asuhumapköra mambörakze. <sup>5</sup> Yenön bömön jalönini Abrahamgö gwölönarök-urupŋi yengö isi moröurupŋina malje. Kraistnöŋ yengörenök gölme sile memba azia asuhuyök. Kraistnöŋ Anutunina aka yuai pakpak galöm köliga qetŋi nalö teteköŋi qahö möpöseimakin. Keu mi ölna.

<sup>6</sup> Mewö maljemö, Israel könagesönöhök asuhum sehiba maljini, neŋön pakpak mönö töndup Israel ambazip ölni qahö akzin. Miangöra Anutugö keuŋan siŋgiiga ösumŋan erök tandök ahakza me? Mewö jibinak, mi keu ölna qahö.

<sup>7</sup> \*Abrahamgö gwölönarök-urupŋi yengörenök ahuzinaŋgöra aka körek neŋön mönö Anutugö nahönböraturupŋa qahö akzin. Mewö qahöpmö, Anutunöŋ Abrahamgöra kewö jiyök, “Aisakö isimoröurupŋan mönö göhören toroqeba qetki bisiba mal öngöme.”

<sup>8</sup> Keu miangö könaŋi kewö: Abrahamgö gwölönarökurup gölme ambazip siliknöŋ morö ahumakzini, körek neŋön mönö Anutugö nahönböraturupŋi qahö akzin. Mewö qahöpmö, Anutunöŋ keu jöhöi ahözawaŋgö dop ahuini, Anutunöŋ mönö ninia möt neŋgiiga Abrahamgö gwölönarökurupŋi ölni akzin. <sup>9</sup> \*Jöhöjöhö keu miangön Abrahamgören kewö kaiga mörök,

\* 9:7: Jen 21.12      \* 9:9: Jen 18.10

“Yambu mohot teköiga miangöreñ kunbuk kaba gekiga Saranöñ mönö morö nahönñambuk akña.”

<sup>10</sup> Keu mewö möri yangöreñ mewö asuhuyökmö, miangöreñök qahö teköyök. Yangö andöñe Rebekagöreñ mewöñanök Anutugö keugö dop asuhuyök. Bömönini Aisak yañön anömñi mi gölöm wañgiiga nahönyahöñjiri siwisiwi asuhuyohot.

<sup>11</sup> Siwisiwi yetkön gölömñe tata qahö asuhuba yuai ölöñji me bölöñji kun qahö ahoñi, Anutunöñ mönö nalö miangöreñ nahön yetköreñök kun nanñangöra möwölöhöyök. Nanñi mötmöt areñan köhöiba öñambuk ak tekömapköra aka munñi möwölöhöyök.

<sup>12</sup> \*Nanñi jitsihitñan öñambuk akñapköra Rebekagöra kewö jiyök, “Datñan mönö munñangö welenqeqeñi aka nembö bapñe malma.” Anutunöñ mewö jiba ahakmemeñjiri akahorahi, miangö dopñe i qahö kewöt etkiyökmö, nanñi mötmöt sihimñi miyök wuatangöba munñi oholiga datñangö ketanñamñi ahök. <sup>13</sup> \*Miangö keuñi Buña Kimbinöñ kewö ohoget ahöza, “Jeikob urunan jöpaköba malalmö, Iso (Esau) mi tököba kazik ak wañgiba malal.”

<sup>14</sup> Keu miangöra mönö denöwö jibinak? Anutunöñ diñdiñi qahö akza me? Mewö qahöpmañöp! <sup>15</sup> \*Anutunöñ Mosesgöra keu kewö jii ahöza, “Nöñön mönö nani jitsihitni wuatangöba kun niñia ehoriba ak kömumangö mötzali, ia mönö ak kömum wañgi-makzal. Kun dagöra wösö mötmöt ak wañgimangö jizali, yangöra mönö

---

\* 9:12: Jen 25.23    \* 9:13: Mal 1.2-3    \* 9:15: Eks 33.19

wösöni mörakzal.” <sup>16</sup> Keu miangöra aka gölme azinöŋ Anutu qahö galöm kölakzapmö, yuaigö sihimŋi möta akŋamgö esapköm bibihibawakmö, mi töndup Anutu qahö oŋgitma. Anutu nanŋak kalem möriamŋaŋgö dop yuai pakpak galöm köliga yangö böröŋe ahöza.

<sup>17</sup> \*Anutunöŋ farao kiŋgöra keu jiiga Buŋa Kimbinöŋ kewö ahöza, “Nani qetbuŋani jim sehigetka gölme körek pakpak dop kölmapköra mötzal. Mewö möta kukösumni kondelbi aukŋe asuhumapköra kuŋgum gihibiga göŋön asuhum tiŋgitnöŋ. Asuhum tiŋgita mala tuarenjoŋ ak niŋgiba malnöŋga mönö luhut al gihial.” <sup>18</sup> Keu miangö dop Anutunöŋ nanŋi jiŋsihitŋi wuatangöba kun ehoriba ak kömumamgö mötzawi, ia mönö ak kömum waŋgimakŋa aka kungö uruŋi mem gwözöŋmamgö jizawi, ia mönö mem gwözöŋniga yangiseŋ ahakŋa. Mewö.

### *Anutugöreŋ irimsesewöl aka ak-kömukömu*

<sup>19</sup> Engöreŋök kunŋan nöŋgöra kewö jibawak, “Mewö aiga körek neŋön mönö Anutugö jiŋsihitŋi tuarenjoŋ ak waŋgibingö osimakzin. Mewö aigun Anutunöŋ mönö wuanöŋgöra toroqeba jim neŋgimakza?” <sup>20</sup> \*Kunŋan mewö jibawakmö, gölme azi gi mönö niŋja aka Anutu tuarenjoŋ aka aŋgururuk ak waŋgibanak? Börösöwönöŋ mönö nanŋi miwimiwikŋai Toŋi kewö ölop qahö jim waŋgima, “Gi mönö wuanöŋgöra tandök kewöŋi miwikŋaim niŋginöŋ?” <sup>21</sup> Kimbut meme azinöŋ mönö nanŋi kukösum qakŋe sihimŋaŋgö

---

\* 9:17: Eks 9.16      \* 9:20: Ais 29.16; 45.9

dop gwaköm melenḁa möwölöhöba gwaköm mohot mianḁgörenök kouranḁen murutḁi murutḁi memakza. Tosatḁi nalö dop memba nupnönḁ alakzin aka tosatḁi aködammunḁinambuk mi mönö sösönḁai nalönḁeyök nupnönḁ alakzin.

<sup>22</sup> Anutu miwimiwikḁai Toninan mönö mewönḁanök ak neḁgimakza. Yanön irimsesewölḁi ambazip kondel neḁgiiga kukösumḁi eka mötpingöra mörakza. Mewö möta irimḁan seholiiga kazikḁan ambazip tosatḁi yeḁḁö qakḁine öḁḁöiga jöjöröba köndenḁ eḁgimamḁö aka malök. Mi töndup likepḁi zilaḁök qahö melenḁ eḁgiyökmö, yeḁḁöra aka sihimbölö gwötpuk möta mökösoḁḁa uruḁini melenḁmegöra mamböta malök.

<sup>23</sup> Mewönḁanök kalem möriamḁi indeli kelenmalelenḁ asuhu-mapköra mörakza. Mewö möta ambazip aködammunḁi buḁa qem aḁḁubingöra möwölöhöm neḁgiyöhi, nini mönö neḁgehoriiiga aködammunḁambuk asarimakzin. <sup>24</sup> Nini mewöyök mewö akingöra neḁgoholök. Juda ambaziwök qahöp mö, kian kantriḁi kantriḁi i mewöyök mewö akḁegöra eḁgoholök. <sup>25</sup> \*Anutunönḁ mianḁö keunḁi jiiga kezapqetok azi Hoseaḁö kimbinönḁ kewö ahöza,

“Ambazip nani könagesöurupni qahö aka malgeri, nönön mönö i eḁgoholbiga nani könagesöni akḁe. Tosatḁan nani wölböt alani qahö malgeri, yeḁḁöra mönö ‘Nani wölböt alaurupni,’ mewö jiba malmam.

<sup>26</sup> \*Nönön gölme kungö ambazip yeḁḁöra kewö jiba malal,

---

\* 9:25: Hos 2.23      \* 9:26: Hos 1.10

‘Injini nani könagesöurupni qahö malje.’ Mewö jiba malalmö, i mönö gölmenjine mianğoreñök engohola qetñini kewö qetmam: Injini mönö Anutu malmal Tonanğö nahönböraturopñi akze. Utekutek mewö asuhuma.”

<sup>27</sup> \*Aisaianöñ mewöyök Israel ambazip neñğöra aka kewö sahöta jiyök, “Israel ambazip janğönini köwet sak ewö akawak ewö, mia kun töndup neñğoreñök awamñi neñönök mönö urunini melenjninga amöt qem neñgima. <sup>28</sup> Kembunöñ gölmenji gölmenji pakpak neñğö keunini zilanğilanğewöta jim teköba likepñi körek melenj neñgim teköma.”

<sup>29</sup> \*Aisaianöñ mewö jiba qeljiñe keu kun jiyöhi, mianğö ölnan mönö neñğoreñ kewö asuhuza, “Kembu kukösum pakpak Toninan gwölönarökurupnini tosatñi qahö enğehori uruñini melenjbeak ewö, gölmeninan lök Sodom ewö melenjni geiga könöp jebawak. Neñön mönö Gomora ambazip ewö ayuhubinak. Anutunöñ lök mewö ak neñgibawak.” Mewö jiyök.

*Israel jesöngöñan Anutu yanğiseñ ak wanğimakze.*

<sup>30</sup> Mianğöra mönö denöwö jibinak? Kantri tosatñan Anutugö jeñe solanñi akingö nupñi qahö kapan köla megeri, yeñön mönö Anutugö jeñe solaniget. Uruñini melenjda Anutu möt narigetka mianğöra keuñini jim teköiga solaniba malje. <sup>31</sup> Mewö maljemö, Israel neñön solanñi akingöra Köna keu wuatangöbingö kapan köla mala kota mi töndup Anutugö jeñe qahö solaniin.

---

\* 9:27: Ais 10.22-23      \* 9:29: Ais 1.9

<sup>32</sup> Mianğö kōnaŋi kewö: Nanŋinanök esapköba ahakmeme diŋdiŋi aka mewö mianğön solanŋi akingö kapan kōla Jisös qahö möt narim waŋgiget. Yaŋön köt pōwōwöm ewö akzawi, mönō yaŋğöreŋ tōtaŋğöba eŋgui qaköba andö qeget. Mianğöra solanŋi qahö aket. <sup>33</sup> \*Mianğö keuŋi Buŋa Kimbinöŋ kewö ohoget ahöza,

“Eket, Anutu nöŋön mönō ain köt kun Zaion kunduŋe Israel kambu uruŋine kuŋgubiga yeŋön mianğöreŋ tōtaŋğöba et eŋgui andö qemakŋe. Kunŋan azi ip pōwōwöm köhöikŋi mi möt narim waŋgimawi, yaŋön mönō nalö kunöŋ yaŋğöra gamu qahö miwikŋaima.” Mewö.

## 10

<sup>1</sup> O urumelen alaurupni, nöŋön nani kōnagesöurupnan uruŋini melenmegöra awöweŋğōmakzal. Anutunöŋ amöt qem eŋgimapkōra uruni qezaköba yeŋğöra aka Anutu köuluköm waŋgimakzal. <sup>2</sup> Yeŋğö kōnaŋamŋinan kewö ahöza: Yeŋön Anutugöra urukönöp ahakzemö, mi gukmaulem qakŋe ahakze. Yeŋğö keuŋini mewö naŋğöba jizal.

<sup>3</sup> Anutunöŋ keunini jim teköiga solanizini, mianğö kōnaŋi qahö möt yaköba nanŋinanök esapköba solanŋi akingö kapan kōlakze. Mewö aka Anutunöŋ keunini jim teköiga solanibingö jimakzawi, keu mianğö bapŋe qahö anda qaköba öne laŋ malje. <sup>4</sup> Kraistnöŋ nanŋök Kōna keu wuatangöm teköyök. Nini tosatŋan mi osiba Kraist möt nariba urunini melenjini, mewö mönō

---

\* 9:33: Ais 28.16



Kraistköra aka Anutugö jeñe solaniba dop köljin. Mewö.

*Anutunöñ nini körek amöt qem neñgimamgö mötza.*

<sup>5</sup> \*Mosesnöñ Köna keu wuatangöba mewö mianjön solanji akingö keunji mi kewö ohoi ahöza, “Köna keu wuatangöm tekömawanjön mönö miangöra aka mal köhöima.” <sup>6</sup> \*Keu mewö ahözapmö, urunini melenđa möt nariinga Anutunöñ keunini jim teköiga solanimakzini, Mosesnöñ miangöra keu kewö jii ahöza, “Urugan kewö mötmöriba jibanbuk: Azi dañön mönö Suep mire öngöbawak?” Ambazipnöñ mi Kraist wangita etmapköra lañ jiget. <sup>7</sup> me “Azi dañön mönö kömup mirigö dutñe gebawak?” Ambazipnöñ mi Kraist wangita kömupnöhök wahötmapköra lañ jiget.

<sup>8</sup> Mewö jiba toroqeba kewö jiyök, “Buña keu mi köröwen qahöpmö, mönö göhö numbuge aka uruge ahöza.” Buña keu mi möt naribingöra aka ahöza. Neñön keu mianjön ambazip uru kuñgum enjiba kewö jim asarim enjimakzin: <sup>9</sup> Anutunöñ Jisös mem gulli kömupnöhök wahörök. Göñön keu mi urugan möt nariba numbu jitkan “Jisösnöñ Kem-buni akza,” mewö jim miwikñaizan ewö, mönö amöt qem gihiiga letotman.

<sup>10</sup> Gi urugan Buña keu möt narinöñga Anutunöñ keugi jim teköiga solaniman aka numbu jitkan Jisös jim miwikñainöñga amöt qem gihiiga letotman.

<sup>11</sup> \*Buña Kimbigö keu kun kewö jiget ahöza, “Dañön i möt narim wangimawi, yanjön mönö gamu

---

\* 10:5: Lew 18.5    \* 10:6: Dut 30.12-14    \* 10:11: Ais 28.16

qahö miwikñajima.” <sup>12</sup> Anutunöñ Juda ambazip qahö neñgek soriba kantri tosantji qahö qepureim enjimakza. Kambu mohot yañön mönö körek neñgö Kembunini aka dop mohotnöñ kewöt neñjimakza. Ambazip i qeta köulukömakzini, yañön mönö kötümötuetñi nini körek kelen-malelen neñjimakza.

<sup>13</sup> \*Miañgö keunji mi Buña Kimbinöñ kewö ahöza, “Ambazip denike yeñön Kembugö qetñi qeta köulukömei, yañön mönö i körek amöt qem enjiiga letotme.”

<sup>14</sup> Ambazipnöñ Kambu qahö möt narim wañgiba yañgö qetñi mönö denöwö qeta köuluköbeak? Yañgö könañi qahö jiget mötkeri, i mönö denöwö möt narim wañgibeak? Kunñan Buña keu qahö jim asarima ewö, yeñön mi mönö denöwö mötpeak? <sup>15</sup> \*Ambazip kun Buña keugöra qahö melaibin ewö, yañön mönö denöwö anda mi jim asaribawak? Miañgö keunji Buña Kimbinöñ kewö ohoget ahöza, “Ambazip Buña keu ölopñi memba kamakzei, yeñgö köna ötöñini möringa qetpuk sorokñi akza.”

<sup>16</sup> \*Mewö ohoget ahözapmö, nöngö Israel könagesö ölni yeñön Ölöwak Buña qahö tem köla malje. Miañgö keunji mi kezapqetok azi Aisaianöñ kewö jii ahöza, “O Kambu, nini Buña keu jim sehiinga dañön mönö uruñi melenða mi möt naribawakto?” <sup>17</sup> Keu miañgö dop Kraistkö keunji jim sehiinga kezapñine geiga mötketka mötnaripñinan mönö mewö asuhuma.

---

\* **10:13:** Joel 2.32    \* **10:15:** Ais 52.7    \* **10:16:** Ais 53.1

18 \*Mötnarip mewö asuhumapmö, kewö qesim engizal: Buña keu mianjôn mönö Juda yeŋgö kezapjine qahö geiga mötket me? Qahö, mi mönö mötket. Mianjög keuŋi mi kewö jigetka Buña Kimbinöŋ ahöza,

“Keu jigetka keu kourukŋinan mönö anda anda gölme pakpak dop kölök. Mi gölmeŋi gölmeŋi eu emu likeplikep mianjöreŋ mötket.”

19 \*Keu mianjög dop Buña keu lök mötketmö, kunbuk toroqeba kewö qesim engizal: Israel ambazipnöŋ mi qahö möt asariget me? Mosesnöŋ mutuk keu kewö jiyök,

“Ambazip könagesö ölni qahö nöŋön mi amöt qem engibiga engö uru mututqututŋinan mönö mianjögöra aka asuhuma. Kian kambu gukmaulem maljei, yeŋön iŋini engoŋgitketka silik mianjôn mönö Juda engö uruŋini kuŋgubiga irimŋini seholiiga uruŋinan wahötma.”

20 \*Aisaianöŋ mönö köhöiba kinda kewö jii ahöza,

“Ambazip ni qahö jarum niŋgiba laŋ malgeri, yeŋön mönö ni miwikŋaim niŋgiget.

Ambazip nöŋgö könanaŋgöra qahö qesiba malgeri, nöŋön könanaŋamni mönö yeŋgöra indelbi mötket.”

21 \*Yeŋgöra mewö jiyökmö, Israel neŋgöra mönö keu kewö jii ahöza, “Silim dop söŋanök könahiba qegetal könagesö kezapjupjup ahakzei, iŋini nöŋgöreŋ kamegöra engohola engöra börö kaek köla malbiga suŋgem ahakza.” Mewö.

\* 10:18: Sum 19.4 \* 10:19: Dut 32.21 \* 10:20: Ais 65.1

\* 10:21: Ais 65.2

# 11

*Israel uruŋe urumelen kambu moröŋi ahöza.*

<sup>1</sup> \*Miangöra kewö qesizal: Anutunöŋ nanŋi könagesöŋi andö qem neŋgiyök me qahö? Mi qahöpmahöp! Nöŋön mewöyök Abrahamgö gwölönarökŋi kun akzal. Nanak Israel könagesögö kambu qetŋi Benjamin miangö uruŋe maljal.

<sup>2</sup> Anutunöŋ nanŋi könagesöŋi qeljiŋe möwölöhöm neŋgiyöhi, nini mönö qahö andö qem neŋgiiga maljin. Kezapqetok azi Elaijagö (Eliagö) kösohotŋi mi Buŋa Kimbinöŋ ohogetka ahöza. Yaŋön Anutugö jeŋe Israel ambazip jim eŋgiba köuluköyöhi, iŋini keu kemaŋi mi mötze me qahö? Keu mi kewö, <sup>3</sup> \**“O Kambu, yeŋön mönö göhö kezapqetok ambazipurupki enguget kömugetka göhöreŋ jöwöwöl ohoho altaŋi altaŋi köndeŋmöndeŋget. Ni mohot nömosötkeŋ malbiga mömö-laköba mönömba nuŋgubingö jöjöröze.”*

<sup>4</sup> \*Mewö jiyökmö, Anutunöŋ mi möta mönö kewö melen waŋgiba jiyök, *“Gi nangok qahö maljanmö, nöŋön azi 7000 mewöŋanök sel jöhöm eŋgibiga nani buŋani aka bem muneŋi Bal i qahö simin köl waŋgiba göbuk toroqeba malje.”* <sup>5</sup> Keu miangö dop nalö kewöŋe mewöŋanök Anutugö kambu moröŋi ahöza. Anutunöŋ kalem möriamŋangö dop ambazip awamŋi möwölöhöm neŋgiiga maljin.

<sup>6</sup> Kalem möriamŋan mönö nam köl waŋgiiga möwölöhöm neŋgiyök. Nini ahakmeme ölöpŋi aka memba malbinahi, miangöra aka qahö möwölöhöm neŋgiyök. Gölme ambazip

---

\* **11:1:** Fil 3.5    \* **11:3:** 1 Kiŋ 19.10, 14    \* **11:4:** 1 Kiŋ 19.18

ahakmemeninan nam köl waŋgiiga möwölöhöm neŋgibawak ewö, yaŋgö kalem möriamŋan mönö yuai omani akawak.

<sup>7</sup> Mianğöra mönö denöwö jibinak? Israel könagesönöŋ solanŋi akingö kapan köla malgetmö, solanibingö könanŋi mi qahö miwikŋaiget. Yeŋön qahöpmö, Anutunöŋ kambu moröŋi möwölöhöm neŋgiyöhi, neŋön kalemŋi mi miwikŋaiba solanŋi ahin. Tosatŋan mötmöt bölöŋan uruŋini gwözöŋni öne laŋ malje. <sup>8</sup>\*Mianğö keuŋi mi Buŋa Kimbinöŋ kewö ohoget ahöza, “Gaun jeje malgetka Anutunöŋ öme qahö jöhöiga uruŋine geiga köhömuŋi aket. Yuai eka könanŋi ek kutubepuköra jeŋini mem sohoiga ömuŋ kölök. Keu kezapŋinan möta möt asaribepuköra mi mem gwözöŋnök. Mewö tönpin mala kota nalö kewöŋe mewöyök öne laŋ malje.” <sup>9</sup>\*Kiŋ Deiwidnöŋ mianğö keuŋi kewö jii ahöza,

“O Anutu, yeŋön közölömbuan ala nempa laŋ söŋgaimakze. Mianğöreŋ mönö eŋgek miwikŋaiba ŋiŋgisöndokŋinaŋğöra simba alnöŋga eŋgimema.

Mönö nanŋini dumŋine tötaŋğöba et eŋguiga likepŋi melen eŋginöŋga sihimbölö mötme.

<sup>10</sup> O Anutu, gi mönö jeŋini mömbauba mem gömölinöŋga uba ekingö osime.

Mönö likepŋi melen eŋginöŋga qakŋine öŋğöba lömböriiga sundan dop upköba malme.”

Deiwidnöŋ mewö köuluköyök.

*Kian kantri yeŋön Anutugö ipŋi ölni aket.*

---

\* **11:8:** Dut 29.4; Ais 29.10      \* **11:9:** Sum 69.22-23

11 Toroqeba kewö qesizal: Juda könagesö ölni yeñön tötangöba et enğuiga uruñinan gwözöñniga ölöwakingö osime me qahö? Mi qahö osime! Et enğuyöhi, mianjön mönö Anutu möt kutubingö awöweñgömegöra aka asuhuyök. Juda könagesö ölni yeñön köna onğita et enğuiga kian kantri yeñön salupñini aka uruñini melenđa Anutugö buñañi aket. Mewö akeri, mianjön uruñini kuñguiga mianğöra irimñini seholiiga uruñini melenjemegö sihimñan asuhumapköra aka mewö asuhuyök.

12 Juda könagesö ölni yeñön köna siñgiba et enğuiga mianğöra kian gölmeñi gölmeñi yeñön oyaenköyaen akingö könañi miwikñaiget. Mi miwikñaiba uruñini melenđa kötümötuet uruñe maljemö, Juda könagesö ölni yeñön tönpin mala Anutugö jeñe qahö dop kölje. Könañep Juda yeñön mewöyök körek uruñini melenje. Mewö asuhuiga Anutugö kötümötuetñan sehiba kelenmalelen aukje asuhuma.

13 Nöñön keuni ki Juda enğöra qahöpmö, kian kantri könagesö enğöra jizal. Nöñön kian kantri enğöreñ melaimelai azi aposol akzalağöra “Nupni qetbuñañambuk akza,” jiba mewö mötmörizal. 14 Nupni mi membi ölni asuhuiga uruñini melenmakzei, nani Israel könagesöurupnan mianğö buzupñi mötmegöra kapañ köla awöweñgömakzal. Buzup keu mianjön mohot mohot yeñgö uruñini kuñguiga mianğöra irimñini seholiiga uruñini melenbingö sihimñan asuhui melengetka Anutunöñ amöt qem enğima. Nupni qetbuñañambuk mi mönö mianğöra aka kian kantri enğö sutñine memakzal.

15 Anutunöŋ Juda kambu andö qem neŋgiiga miangö ölŋan mönö kewö asuhuyök: Kian kantriŋi kantriŋi eŋön salupŋine aketka Anutunöŋ töwaŋini qeba eŋgömeiga alaurupŋi aket. Juda könagesö ölŋi yeŋön uruŋini melengetka Anutunöŋ amöt qem eŋgiba möt aŋgön köl eŋgimawi, miangö ölŋan mönö kömupnöhök guliba mal köhöimeanğö dop akŋa.

16 Yambu jeŋiqeŋe dölökŋe nene Anutugöra kewöta ala sösöŋgai ahinga sarakŋi akza ewö, nupkö numbu neneŋi pakpak mönö mewöyök sarakŋi akza. Ip jalöŋan töröŋi akza ewö, böröŋan mönö mewöyök töröŋi akze. 17 Juda kambu mi Anutu nanŋaŋgö oil ipŋi akza. Anutunöŋ nanŋi oil ipŋi mi öŋböŋi memba böröŋi tosatŋi mitii etket aka arökŋaŋgö oil ip böröŋi memba kaba sutŋine ali toroqeba qarimakze. Kantri tosatŋi iŋini arökŋaŋgö oil ip miangö dop akzemö, Anutunöŋ töndup eŋgömeiga nalö kewöŋe ip börö qainŋi kun mienğö sutŋine mal köhöimakze. Iŋini mönö Juda kambugö oil ip jalöŋeyök nene oŋi öröba memba qarimakze.

18 Iŋini Juda nembuk kinjemö, töndup Juda neŋgoŋgita silenŋini memba öŋgöbepuk. Silenŋini mem öŋgöbeak ewö, mönö keu ki mötme: Kantri tosatŋi iŋini ip böröŋanök ewö akze. Iŋini jalönini qahö bisimakzemö, nanine ip jalöŋan mönö iŋini eŋgömiŋiiga kinje.

19 Keu kewö jibeak, “Anutunöŋ nini nanŋi ip kembaŋe al neŋgimapköra aka ip böröŋi mi kutui eriga tiŋi asuhuyök.” 20 Keu mi ölŋa. Anutunöŋ Juda ambazip uruŋini qahö melenđa möt narigeranğöra aka kutum eŋgii etketmö,

inini mönö mötnaripñinan töndangöm enğiiga zen kinje. Mewö kinda jakbak-öranböran kude aka aiweliköba malmemö, mönö kewö et engubapuköra sömbuñini möta malme: <sup>21</sup> Anutunöñ nanñi ipñangö böröñi ölni qahö engehoriba Juda könagesö kutum engiyök ewö, inini mönö “Ölöp nengehorima,” mewö jibepuk. Öne mewö mötmöriba lañ malbepuk. <sup>22</sup> Miangöra kian kantri inini Anutugö könañi mötmöriba kewö jime, “Juda ambazip köna siñgiba et enguyöhi, Anutunöñ miangö likepñi melenja mönö ölna könöpñambuk ak engimakzapmö, nini ölöwak Toñambuk qekötahöba kininga mem ölöwak nenngimakza. Yambuk qahö toroqeba kinbin ewö, mönö kantri tosatñi nini mewöyök kutum nenñii etpin.”

<sup>23</sup> Mewö ölöp jimemö, Anutunöñ ambazip köna siñgigeri, mi mewöyök ölöp köhöiba ip kembrañe kunbuk toroqem engima. Miangöra Juda könagesö yenñon yanñisenñini mosöta uruñini melenje ewö, i mönö ölöp Jisösbuk toroqem engima. <sup>24</sup> Anutunöñ inini arökñangö oil ip miangöreñök kutum enñgiba kölkömötkö könañi onñgita oil ip qainñi kungö kembrañe al enñii toroqeget. Kantri tosatñi inini mewö ak engiyök ewö, miangöra nanñi ip böröñi ölni Juda könagesö ölni mi mönö amqeba enñgömemba sihimñan nanñi oil ipñangö kembrañe al enñii kunbuk toroqeme. Mewö.

*Anutunöñ Israel körek ak kömum nenngimangö mötza.*

<sup>25</sup> O urumelenñ alaurupni, nanñini mötkutukutu qakñe lañ malbepuköra mönö keu tölapñi kun



indela môt asarimegöra môtzal. Keu mi kewö: Mötmöt bölöñan Israel könagesögö bahöñi kun yeñgö uruñini gwözöñni maljemö, nalö teteköñi qahö yañgiseñ qahö toroqeba malme. Qahöpmö, mutuk kian kantri yeñgöreñök jesöñgöñan uruñini melenja Anutugö bemtohoñ uruñe kañgotme. Mewö aketka Anutunöñ jañgöñini ehi dop kölmawi, nalö miangöreñ Juda könagesö neñgö yañgiseñ nalöñinan teköiga körek uruñini melenje.

<sup>26</sup> \*Uruñini melenjetka Anutunöñ Israel könagesö pakpak amöt qem enjiiga letotme. Miangö keuñi mi Buja Kimbinöñ kewö ohoget ahöza,  
 “Amötqege Toñan mönö Zaion kunduneyök asuhuba Jeikob kambu neñgö ahakmemenini añgöjörakñambuk mi köl könjöratma.

<sup>27</sup> \*Anutu nöñön siñgisöndokñini köl könjörata oy-aenköyaen akingö jöhöjöhö areñi mi yembuk akiga mohotje malbin.”

Keu mewö ahöza.

<sup>28</sup> Juda könagesö ölni yeñön Ölöwak Buja andö qeba Anutugö kerökurupñi akerañgöra kantri tosatñi eñön salupñine Anutugö alaurupñi akze. Mewö akzemö, Anutunöñ Israel bömön jalö-urupnini möwölöhöm enjiyöhañgöra Juda neñön mönö toroqeba wölböt alaurupñi ölbölni akzin.

<sup>29</sup> Anutunöñ ambazip niñia möwölöhöba engohola kalem enjimakzawi, keu mi mönö kunbuk uruñi möñaiiga utekömawañgö dop qahö. <sup>30</sup> Kian kantri iñini mewöyök mutuk Anutugö jitñi qahö tem köla lañ malgetmö, Juda könagesö ölni yeñön yañgiseñ

\* 11:26: Ais 59.20 \* 11:27: Jer 31.33-34

akeranğöra aka Anutunöŋ inini ak kömum enğiiga letotket.

<sup>31</sup> Juda könagesö ölni yeŋön nalö kewöŋe Anutugö jitŋi qetala laŋ mala kotzemö, eŋön letotkeranğöra aka Anutunöŋ Juda könagesö nini mewöŋanök nalö kewöŋe ak kömum neŋgimangö mötza. Kian kantri eŋön uruŋini melenđa letotketka mianğö silikŋan uruŋini kuŋgumakzawi, mianğöra yeŋön mönö mewö-ŋanök amqeba uruŋini melenđa ak-kömükömuŋi buŋa qem anğume.

<sup>32</sup> Ambazip lökŋanök pakpak nini Anutu qetala laŋ malinga qequetalnini miwikŋaiba gwaröhöm neŋgiyök. Körek pakpak ak kömum neŋgimapköra aka kösönöŋ gwaröhöm neŋgiyök. Mewö.

*Anutu möpöseiba omsa liŋet kewö kölakzin:*

<sup>33</sup> \*Anutu kalem möriamŋanğö köweŋan mönö keta bölökŋi akza. Iwinanğö jitŋi, mötmötŋi mönö gegeŋi teteköŋi qahö. Mötkutukutuŋan neŋgoŋgita öŋgöŋgöŋi ketanŋi akza. Yaŋön keunini kewöta jim tekömakzawi, neŋön mi lökŋanök jim asarim teköbingö osibin. Malmalninanğö köna areŋgömakzawi, mianğö könanŋi mönö möt kewöta miwikŋaim teköbinanğö dop qahö.

<sup>34</sup> \*“Kembugö urukönömŋanğö areŋi mi ambazip körekŋan möt yaköbingö osiba mala korin. Kuŋŋan kun goro waŋgimawaŋğö dop qahö.”

<sup>35</sup> \*“Gölme ambazip kalem anğumakzinmö, yambuk mewö akingö osiba mala korin.

---

\* 11:33: Ais 55.8    \* 11:34: Ais 40.13    \* 11:35: Job 41.11

Yuai waŋgiinga kitipŋi qahö melen neŋgiiga ölop dop köl waŋgiza. Yuai kun bian neŋgimapkö tosa waŋgibingö osimakzin.”

<sup>36</sup> \*Mi kewögöra osimakzin: Yaŋön yuai pakpakö Tonji aka bömön jalöŋi akza. Yaŋön yuai pakpak nam köliga asuhuyök. Mi nanŋi aködamun miwikŋaim waŋgimapköra aka asuhuyök. Miaŋgöra neŋön qetbuŋaŋi möpöseininga teteköŋi qahö aködamunŋambuk ahöba öŋgöba ahöma. Keu mi ölna.

## 12

*Malmalnini denöwö malinga Anutugörej dop kölma?*

<sup>1</sup> O urumelen alaurupni, Anutunöŋ mewö ak kömum neŋgiyö-haŋgöra nöŋön mönö uruŋini kewö kuŋgum eŋgizal: Inini mönö ak-kömukömuŋi mi urukönömŋinan mötmöriba miaŋgö dop kitipŋi melen waŋgiba waikŋi memba möpöseiba malme. Mewöyök nanŋini silenini mi Anutugö kötön naluha alme. Mewö alme ewö, inini mönö guliba sarakŋi aketka Anutunöŋ nalukŋini mi ehi dop köli sihimŋi mörakŋa.

<sup>2</sup> Mutuk gölmegö ahakmeme bölöŋaŋgö areŋi wuatangöba malgetmö, nalö kewöŋe mewö kude toroqeba ahakŋe. Mewö qahöpmö, mönö urumötmötŋinan kölöŋaiiga letota malme. Mewö mala Anutunöŋ eŋgöra sihimŋi denöwö mötzawi, mi jaruba ölop köhöiba kewöta miwikŋaime. Mi miwikŋaiba miaŋgö dop ahakŋe ewö, mönö

---

\* 11:36: 1 Kor 8.6

köna ölopñi wuatangögetka dop köl wanji aködamunñinambuk ahakñe.

<sup>3</sup> Siksauk lañ malbepuköra keu kun jimam. Anutunöñ kalem möriam niñgiiga miangö qakñe kinda körek engöra kewö jizal: Inini mönö nanñini mötket öngöngöñi qahö akñapmö, mohot mohot inini mönö törörök möt kutum anguba malme. Anutunöñ mötnarip neñgiiga miangö ölni asuhumakzawangö dop mönö nanñini kewöt anguba miangö dopkeu jiba malme.

<sup>4</sup> \*Miangö könañi kewö: Sileninan mohot akzapmö, sile kitipnini mi gwötpuk. Kitipñi pakpak mienön nup mohot miyöhök qahö memakze. <sup>5</sup> Miangö dop urumelen ambazip neñön mewöyök gwötpuk maljinmö, töndup Kraistpuk qekötahöba kinda sile ewö ölni mohot akzin. Mohot akzinmö, nanñök nanñök neñön mönö toroqem anguba mohotñe nup meinga dop köli kinjin.

<sup>6</sup> \*Anutunöñ kalem möriamñi neñgiyöhangö dop nup memegö mötmöt kalem murutñi murutñi buña qem anguba maljin. Kunöñ kezapqetok nupkö mötmöt kalemñi buña qem angusa ewö, yañön mi mönö nupnöñ alakña. Mötnaripñan töndangöm wanji-makzawangö dop nupnöñ ala Anutugö keuñi jiba malma. <sup>7</sup> Kungöra welenqece nupkö mötmöt kalemñi wanjiyök ewö, miangö dop mönö tosatñi pöndañ bauköm engiba malma. Kungöra böhi qaqazu nup memapkö mötmöt kalemñi wanjiyök ewö, yañön mönö memburik-

---

\* 12:4: 1 Kor 12.12      \* 12:6: 1 Kor 12.4-11

qemburikñi qahö pöndañ tosatñi kusum engiba malma.

<sup>8</sup> Kungöra uru nañgönañgö nupkö mötmöt kalemñi wañgiyök ewö, yañön mönö pöndañ kapañ köla ambazip uruñini kunguba nañgöm engiba malma. Tosatñan yuaigöra mözöröñgöba osigetka kungöra i nañgöm engimapkö mötmöt kalemñi wañgiyök ewö, yañön mönö koñgwarakñi qahö pöndañ nañgöm engiba malma. Kungöra galömkölköl nupkö mötmöt kalemñi wañgiyök ewö, yañön mönö zeñ kinda tosatñi galöm köl engiba malma. Kungöra urukalem nupkö mötmöt kalemñi wañgiyök ewö, yañön nup mi mönö sösöñgai qakñe memba malma. Mewö.

*Urukalemgö könañi törörök wuatangöme.*

<sup>9</sup> Mönö geñmoñ mosöta törörök urukalem ak añguba malme. Bölöñi sisit memba andö qeba malme. Ölöpñangöra ak engiiga miangöreñ mönö qekötahöba malme. <sup>10</sup> Urumeleñ alaurupñini mi mönö guñböñjönjön qakñe ak engiba törörök jöpaköm añguba malme. Göda qem añgubingö kapañ kölakzei, miangöreñ mönö awöweñgöba möpöseim añguba malme.

<sup>11</sup> Uruñinan mönö kude sörauba löwörimapmö, köulukögetka Uña Töröñan inahöm engiiga urukönöpnöñ kinda Kembugö nup memba malme. <sup>12</sup> Jörömqöröm aka sösöñgainöñ malme. Kahasililiñ möta mökösoñda malme. Mönö böñ kinda Anutu köuluköba malme. <sup>13</sup> Anutugö ambazip sarakñan yuaigöra osizei, i mönö bauköm engiba malme. Mönö ambazip köl öröm engiba mohotñe tata nene nem sösöñgai ahakñe.

14 \*Sesewerowero ak enġimakzei, ambazip mi mōnō kude qesuahōm enġimemō, mōnō Anutu kōulukōgetka kōtuetkōm enġimakña. 15 Sōnġaizei, yembuk mōnō baukōba sōnġaime. Sahōtzei, yembuk mōnō baukōba sahōtme. 16 \*Mōnō urumohot ak aṅguba luainōḡ malme. Nanḡinaṅgōra mōnō kude mōtket oṅgōma. Jakbak-ōraṅbōraṅ kude akṅemō, ambazip eretṅi mōnō ala ak enġiba malme. Nanḡinaṅgōra mōtketka mōtkutukutu ambaziwa maljeaṅgō dop kude akña.

17 Jinōḡ jibi, nuṅgunōḡ guhubi, aknōḡ aki mi kungōra kude akṅe. Ambazip kōrekṅan silik tosatṅi mienġōra mōtketka ahakmeme ölöṅṅi akzei, mi mōnō kapaṅ kōla memba malme. 18 Yuai kungōreḡ qahō qakōze ewō, mōnō kōhōkōhōi ahōm enġizawaṅgō dop kapaṅ kōla ambazip kōrek yembuk luainōḡ malme.

19 \*Keu kun mi Buṅa Kimbinōḡ kewō ohoget ahōza, “Nōḡōn mōnō bōlōṅaṅgō likeṅṅi melenḡbiga qakṅine oṅgōma. Mi nōḡgō nuwa. Kembu nōḡōn mewō jizal.” Mianġōra wōlbōt alaurupni, iḡini nanḡinak bōlōṅaṅgō likeṅṅi kude melenḡmemō, mi Anutugōra mosōtketka irimṅan sehōliiġa enġō ki-tiṅṅi melenḡda mekōm enġima.

20 \*Mianġōra mi nanḡinak kude melenḡmemō, Buṅa keu ki mōnō wuatāṅgōba malme, “Kerōkan nenegō kōmuza ewō, i mōnō nene gumohom waṅgiman. Gōhō kerōkan ogō mōtza ewō, i mōnō o waṅḡinōḡga nema. Mewō aka gōhōreḡ silik ölöṅṅi mianḡōn mōnō uru kuṅgum waṅḡinōḡga gamuṅi

---

\* 12:14: Mat 5.44; Luk 6.28    \* 12:16: Qam 3.7    \* 12:19: Dut 32.35    \* 12:20: Qam 25.21-22

möta mosötpawak.” Keu mi mönö wuatangöba malme. <sup>21</sup> Kunjan silik bölöni mianjon luhut al gihibapukmö, nangk mönö silik ölopni aka mianjon luhut al wangiba silikni bölöni mi koyonaniman. Mewö.

## 13

*Gawman yengö keu bapjine anda tem köla malme.*

<sup>1</sup> Gawman kun mi nanjök qahö asuhuyökmö, Anutu, kukösum Tonji yanjon mönö gawman kunjui mianjögö dop ketanaminan kukösum qakne kinda galöm köl engimakze. Jimkutukutu nupkö kondotkondotni mi Anutu. Mianjögöra injini körek mönö nanjini gawman yengö keu bapje anda malme.

<sup>2</sup> Könanj mewö mötzeangöra aka kunjan jimkutukutu galöm yengö kukösumjini qetaljawi, yanjon Anutunöng malmalgö arenj alöhi, mönö mi qetalja. Jimkutukutu Tonji qetaljei, Anutunöng yengö keunjini jim teköba likepni melenj engiiga lömböt miwiknjaima.

<sup>3</sup> Galömkölköl yenjon ambazip ahakmeme bölöni ahakzei, mi kenjöt mötmöt ak engimakzemö, ölopni ahakzei, mi mewö qahö ak engimakze. Mianjögöra galöm kukösumjinambuk yengö kenjötki mötmamgö mötzan me qahö? Mi qahö mötmamgö mötzan ewö, mönö ahakmeme ölopni aka memba malnönga möpöseim gihimakje.

<sup>4</sup> Gawman yanjon mönö Anutu welenni qeba mem ölowak gihibingö mötze. Mewö mötzeangöra ambazip bölöni akzei, mönö mianjögö likepni melenja qakjine öngöi lömböt mötmegöra kinje. Anutugö welenqeurupni aketka buldömingö

sou ketanji engiyöhi, mi öne töhön qahö memba malje. Miangöra yuai bölöni akzan ewö, mönö kenngötöki möta malman. <sup>5</sup> Lömböt qaknjine öngöi mötpepuköra mönö gawman jitnjini tem köla malme. Miangörök qahöpmö, Anutugö jeje mohot dop kölmapköra mönö mewö ahakje. Qahö tem kölgetka Anutugö irimjan sehooli jii urukönömjanan mewö mötketka urunjan bölöbapuköra mönö mewöyök gawman yengö keu bapje anda malme.

<sup>6</sup> \*Gawman yengön mönö Anutugö nup bahöni kun memba miangören zej kinda galöm köl engimakze. Nupjini mi memegöra enön mönö bauköm engiba takis mewöyök alakze. <sup>7</sup> Gawmangö takis aka kötön könanji könanji dawik engimegö jimakzei, mi mönö körek miangö dop engimakje. Gawmangö takis könanji könanji pakpak mi mönö törörök engimakje. Gawmangö nup meme ambazip yengöra mönö ewe ala göda qem engimakje. Mewö.

*Nalö ketanjan dopdowiiga mönö jöpaköm anguba malme.*

<sup>8</sup> Mewö aka kungören tosa kun embuk kude ahöi malme. Töndup engö tosanjini mohok-kun mi nalö dop kewö ahöza: Injini mönö uru jöpaköm anguba malme. Kunjan tosatnji jöpaköba urukalem ak engimakzawi, yanön mönö Köna keu wuatangöm tekömakza.

<sup>9</sup> \*Jöjopa keu bohonji kewö, “Nangi jöpaköm angumakzani, miangö dop mönö tosatnji pakpak

---

\* 13:6: Mat 22.21; Mak 12.17; Luk 20.25      \* 13:9: Eks 20.13-15, 17; Dut 5.17-19, 21; Lew 19.18



jöpaköm engimakñan.” Keu miangö uruñe jöjöpañ keu kewöñi ahöze, “Sero yoñgorö kude akñan,” “Ambazip kun kude qenöñ kömuma,” “Yoñgorö kude meman,” “Yuaigöra mönö kude köpösöñgöman.” Mi aka jöjöpañ keu tosatñi pakpak mi mönö keu bohonñi miangö nemböñe akze.

<sup>10</sup> Ambazip kun jöpaköm wangizan ewö, yangöra mönö yuai bölöñi kun kude ak wangiman. Miangöra urukalem aka mewö mianöñ mönö jöjöpañ keu körek pakpak tem köla wuatangö-makzan.

<sup>11</sup> Nalö kiangö könani mötzeangöra mönö ahakmeme mewöñi aka memba malme. Mutuk Kraist möt nariba urunini melenñini, nalö miangöreñök könahiba mala koringa Kembunöñ meköm nenñii Suepnöñ öñgöbini, miangö nalöñan mönö dowe ahöza. Miangöra inñi gaun ahözei, miangöreñök imbiñini möta wahötmeangö nalöñan mönö lök kam kuñguza. <sup>12</sup> Sungem köröpñi malinga wehön jeñi jililingöba koriga asarimangö akza. Miangöra söñauptö ahakmeme mi mönö tömbulunaniget geiga asakñangö bim qebingö aködamunñi mi mönö memba kölget geiga kinbin.

<sup>13</sup> Asakñangö uruñe maljinangö dop mönö ahakmeme sarakñi aka memba malbin. Tosatñan közölömbuan pati ala bau numbu nempa o köhöikñangöra enjololöñ ahakze. Sero namböñnamböñ aka lañ ambi yoñgorö örömakze. Julia denña angururuk aka angöhöba urunöñ mututqutut möta andönöñ qem angumakze. Ahakmeme mewöñan mönö qahö dop kölja. <sup>14</sup> Urusilegö sihim kömbönañini bölöñan guliba wahötketka miengö sihimñini tem köl

engibepuköra mönö mi kude kezap ala mötmörim engimakje. Mewö qahöpmö, Kembu Jisös Kraistkö ahakmemenjan mönö timbi saiwanjini aiga mi maluku ewö löngöt anguba malme. Mewö.

## 14

*Alaurup lölöwöröni i kude jim engiba malme.*

<sup>1</sup> \*Kungö mötnaripñan lölöwöröni aiga i mönö köyan köla köl öröm wanjiba malme. Yambuk eraum möta kösawöran keugöra jitrakölik kude ahakje. <sup>2</sup> Tosatñan mötnaripñinangö dop nene pakpak ölop nemakzemö, tosatñi yengö mötnaripñinan lölöwöröni aiga nene piakñanök nemakze. Uruñinan tölohobapuköra uruyahöt aka sömbup tandö lopiongö naluk alañi mi sisitñi memba yöha töhönök inanñik ohom nemakze. <sup>3</sup> Nene pakpak nemakzeañön mönö alaurupñini yöhayök nemakzei, mi jijiwilit kude ak engimakje. Anutunöñ alaurupñini nene pakpak nemakzei, mi mewöyök “Dop kölje,” jiba köyan köl engimakza. Miangöra yöhayök nemakzei, enñön mönö alaurupñini yengö keuñini kude jim teköme.

<sup>4</sup> Göñön mönö niñia aka kungö welenqeqeni jim teköm wanjibanak? Yanñön mönö nanñi toñangö jene keuñangö likepñi juiga kewöta jim teköiga dop köliga kinma me lömböt qakje öngöiga etma. Kembunöñ mönö köhöiba böñ qeba kinmapköra nanñöm wanjimakña. Miangöra mönö ölop böñ qeba kinma.

<sup>5</sup> Tosatñan silim pakpaköra mötmörigetka tandökñini öröröñ ahözemö, tosatñan silimñi

---

\* 14:1: Kol 2.16

silimñi kewöta silim kungö mötket öngöiga qainñi kun aiga silim tosatñan mianğö nemböñe akze. Inini mohot mohot mönö nanñini mötmötnini qekötahöba mianğöreñ uruyahöt körek yaköriba awösamkakak kinda malme. <sup>6</sup> Tosatñan silimñi silimñi kewöta öngöba eta alakzei, yeñön mi mönö Kembu qetbuña wañgimapköra aka ahakze. Tosatñan sömbup nemakzei, yeñön mönö Anutu möpöseiba Kembunöñ mewö qetbuñañambuk akñapköra nemakze. Tosatñan sömbupkö siñgi malakzei, yeñön mönö Kembunöñ qetbuñañambuk akñapköra aka mi ahakze aka mewö mala Anutu möpöseimakze. <sup>7</sup> Neñğöreñök kunñan kun mönö nanñanğörök qahö malja aka nanñanğörök qahö kömuma.

<sup>8</sup> Mianğö könañi kewö: Jebuk malbin ewö, mönö malmalnini Kembugöra köleñda malbin. Kömumbin ewö, mönö Kembugöra kömumbin. Mianğöra malbin me kömumbin ewö, mönö Kembugö buñaya akzin. <sup>9</sup> Kraistnöñ mönö kömugeru aka jebuk maljini, körek neñğö Kembunini aka malmapköra kömumba guliyök. <sup>10</sup> \*Anutunöñ mönö körek neñğuañgita nanñi keu jakeñe al neñgiiga kinbin. Mianğöra tosatñi eñön mönö niñia aka urumelen alaurupñini jim teköm eñgimakze? Mewöyök alaurupni tosatñi eñön mönö wuanöngöra urumelen alaurupñini tosatñi mi jijiwilit ak eñgimakze? Jujul silikñini mianñön mönö qahö dop kölja. <sup>11</sup> \*Mianğö keuñi mi Buña Kimbinöñ kewö ohoget ahöza, “Kembu nöñön mal köhöizali, mianğö dopkeu öl

\* 14:10: 2 Kor 5.10      \* 14:11: Ais 45.23

töhönñi kewö jizal: Ambazip körek pakpak inñini mönö nönğö jemesoholne simin köla jitñinan Anutu ni möpöseim niñgime.”

<sup>12</sup> Keu miangö dop nini körekñan mönö inanñök inanñök ahakmemeninangö kösohotnini mi Anutugöra jim asariinga kewöt neñgima. Mewö.

*Kunöñ tötangöba et qebapuköra mötmörime.*

<sup>13</sup> Miangöra mönö kude toroqeba jim bölim anguba keuñini jim teköme. Urumelenj alaurup yengö könanöñ tötangöba et engubapukö yuai kun mönö kude alakñe. Miangö keuñi mönö kapanj köla jiba jöhöme. <sup>14</sup> Nene yuai kunöñ nanñanök angöjörakñambuk qahö akzapmö, ambazipnöñ yuaigö mötketka angöjörakñambuk akzawi, yengöröhök mi angöjörakñambuk akza. Nönön Kembu Jisösbuk kinda keu mi möta miangöra uruyahöt kun qahö akzal. <sup>15</sup> Anutunöñ nene pakpak amöt qem teköi sarakñi akzemö, töndup alaurup tosatñan dönqiziziniñini aka sömbup qahö nemakze. Kraistnöñ yengöra aka kömuiga tosatñi enñon mönö wuanöngöra sömbup nemba mewö miangön yengö uruñini mem bölimakze? Mewö nanñini imbi-imbi aketka urumelenj alaurupñinan miangöra wösöbirik ahakzei, mewö mönö urukalemgö könañi mi qahö toroqeba wuatangömakze.

<sup>16</sup> Mötmöt ölöpnji ahöm engizapmö, miangö qakñe ahak-memeninan lañ aketka tosatñan miangöra sirongen keu jiba jim engimakze. Mewö asuhubapuköra galöm mem anguba malme. <sup>17</sup> Wani neneya nembini aka wani oya nembini, miangön Anutu

bemtohoṅaṅgö aiwesökṅi qahö akza. Yuai mi-aṅön mönö eretṅi akza. Yaṅgö bemtohoṅ uruṅe malmalgö ölnṅi mi kewö: Uṅa Töröṅan inahöm neṅgiiga ahakmeme diṅdiṅi wuatāṅgöinga luai qem neṅgiiga söṅgaiba maljin. Mianṅön mönö aiwesök muṅgemṅi akza. <sup>18</sup>Denike yeṅön mewö aka Kraistkö welenni qemakzei, yeṅön mönö Anutugö jeṅe dop kölgetka ambazipnöṅ keuṅini mötketka dop köl eṅgimakza.

<sup>19</sup> Mianṅöra nini luai qem aṅginga urumohot sehimapköra kapaṅ kölbin. Mewö mianṅön mönö urunini möhamgöba mem köhöim aṅgubin. <sup>20</sup> Anutunöṅ nene pakpak amöt qem teköi sarakṅi akze, mi mötzinmö, kunöṅ sömbup me nene kun neiga alaṅaṅgö uruṅan mianṅöra böliiga urukönöpṅi ahuiga siṅgisön-dokpuk akzawi, mianṅön mönö qahö dop kölja. Kunṅan tosatṅi yeṅöra qahö mötmöriba nanṅaṅörök möta laṅ nezawi, yaṅön mönö mewöyök siṅgisöndokpuk akṅa. Mianṅöra Anutunöṅ yeṅö uruṅine nupṅi meyöhi, tosatṅi eṅön mönö nupṅi ölöṅṅi mi nenegöra aka kude mem bölime.

<sup>21</sup> Mianṅöra urumelenṅ alaurupṅini yeṅöra aka sömbupkö siṅgi mala wain o mi kude nempa malme. Mewö mianṅön mönö mohotṅe ölöwakṅe. Mewöyök uruṅinan yuaigöra aka böliiga siṅgisöndokpuk aka löwöribawak, eṅön mi kude akṅe. Mewö mönö mohotṅe ölöwakṅe. <sup>22</sup> Kösäwöraṅ keugö mötnariṅṅi mewö me mewö ahöm gihizawi, mi mönö Anutugö jemesoholṅe aṅgön köla malman. Kunṅan keu kungöra “Dop kölja,” jiba mianṅöreṅ qekötahöba möt köhöiba

mianğöra nanñi qahö jim teköm anğuzawi, yañön mönö simbawoñ akza.

<sup>23</sup> I me wai mötnarip qakñe qahö kinda ahakzini, mi pakpak mönö siñgisöndok akza. Mianğöra kunñan nene kungöra uruyahöt aka töndup mi neza ewö, yañön mönö mewö siñgisöndok akña. Mötnarip qakñe qahö kinda nezawañğöra Anutunöñ mönö yañğö keuñi jim teköi qaköba lömböt miwikñaima. Mewö.

## 15

### *Mönö Kraistkö mötmötñi wuatañğöba malme.*

<sup>1</sup> Mötnaripninan köhöikñi akzawi, neñön mönö naninañğörök lañ sönğaiba nanini imbi-  
imbi malbinbuk. Tosatñi yañğö mötnaripñinan lölöwöröñi aiga tötöpinpinöñ köna oñgita törörök qahö wuatañğömakzei, neñön i urukalem ak enğiba lömbötñini bisimegö bauköm enğibin. <sup>2</sup> Nini mohot mohot mönö alaurup-ninan ölöwakñeangö dop mötmöriba ak enğimakin. Mewö ak enğiba uruñini möhamğögetka köhököhöi miwikñaima.

<sup>3</sup> \*Kraistnöñ mewöyök nanñañğörök nanñi imbi-  
imbi qahö sönğaiba ahökmö, Buña keu kianğö dop ak wañgigetka malök, “Ambazip keu töhöreñ jiba gi jim gihimakzei, yañğö keuñinan mönö nuñguiga sihimbölöñi mörakzal.” Keu mewö ahöza.

<sup>4</sup> Anutunöñ neñğöra sihimñi kewö mörakza: Neñön kapan köla köhöiba kinda Buña Kimbi oyoñninga urunini nañğöiga mewö mianñön jörömqöröm aka malbin. Mianğöra Buña keu pakpak mönöwök ohogeri, Anutunöñ mönö

---

\* 15:3: Sum 69.9

mianğö dop kusum neŋgimamğö môtza. Mianğöra mi ohoget ahöza. <sup>5</sup> Anutunöŋ mönö nanŋak uruŋini nanğöiga ölop kapaŋ köla kin köhöime. Yaŋön mönö Uŋaŋi eŋgiiga inahöm eŋgiiga sutŋine uru jöhöjöhö aka Kraist Jisösgö mötmötŋi wuatangöba malme.

<sup>6</sup> Mewö mala ölop urumohot çakŋe numbuŋini mindiriba Anutu, Kembunini Jisös Kraistkö Iwiŋi mi möpöseiba malme. Anutunöŋ eŋön mewö aka malmegöra mörakza. Mewö.

*Ölöwak Buŋanöŋ kantri tosatŋe anda kayök.*

<sup>7</sup> Kraistnöŋ iŋini môt aŋğön köla köyan köl eŋgimakzawi, mianğö dop iŋini mönö mewöyök köyan köl aŋguba malme. Anutugö qetbuŋaŋan sehimapköra mönö mewö aka malme. <sup>8</sup> Nöŋön keu ölni ki jimam: Anutunöŋ keuŋi keuŋi Juda könagesö neŋğö bömönurupnini yeŋğöra jiba jöhöyöhi, mianğön ölnambuk akŋapköra mörök. Mianğöra Kraist melaiiga Anutugö Buŋa keu ölnan köhöimapköra aka Juda neŋğö sutŋine eta welen qem neŋgiba malök. <sup>9</sup> \*Juda nini welen qem neŋgiba malökmö, kantri tosatŋi yeŋön mewöyök yaŋğö ak-kömükömuŋi möta mianğöra Anutu möpöseiba malje. Mianğö keuŋi mi Buŋa Kimbinöŋ kewö ohoget ahöza,

“Mianğöra nöŋön kantri tosatŋi yeŋğö sutŋine mala möpöseim gihiba qetbuŋagan sehimapköra liŋet kölakŋam.”

<sup>10</sup>\* Mianğö keuŋi kun mi kewö jiba ohoget ahöza, “Anutunöŋ Juda nini möwölöhöm neŋgiiga könagesöŋi aka söŋgaimakzin. Kantri tosatŋi

\* 15:9: 2 Sml 22.50; Sum 18.49      \* 15:10: Dut 32.43

iñini mönö nembuk toroqeba söngai  
köirañ ala malme.”

11 \*Miangö keuñi kun mi kewö,  
“Kian kantrigö kambu pakpak iñini mönö Kembu  
möpöseiba malme. Gölme dop maljei, iñini  
mönö körek ‘Anutu saiwap!’ jiba liñet köla  
malme.”

12 \*Kezapqetok azi Aisaia yañön mewöyök  
mianğö keuñi kewö jii ahöza,  
“Azi qetñi Jesi yağö andöjalöñan mönö söñji  
jula wahöta ambazip gölme dop galöm köl  
engima.

Mewö ak engiiga jörömqöröñjini yağören ala  
bauköm engimapköra mamböta malme.”

Keu walñi mianğön mönö nalö kewöñe öñjambuk  
ahakza.

13 Uña Töröñangö ösumñan mönö nağöm engiiga  
jöröm-qöröñjan köhöiba pöwöwöm akñapköra  
mötzal. Mianğöra jörömqöröm Toñi Anutu yañön  
mönö luai qem engiba sösongai pakpak mianğön  
uruñini kokolak qema. Mewö köuluköbiga ölop  
Anutu möt narim wañgiba oyaenköyaen akingö  
mamböta malme. Mewö.

*Keu köhöikñi mi denöwögöra ohozal?*

14 O urumelen alaurupni, nanak engöra kewö  
möt köhöizal: Iñini mönö tönpin qahö maljemö,  
Anutunöñ yuai pakpak ölopñi uruñine ali koko-  
lak qeiga mötmöt könañi könañi miwikñaiba mi-  
añön ölop goro qeba kusum añgubinağö dop  
akze. 15 Mewö akzemö, töndup keu mi ölum  
engubapaköra möta miengö könañini mi kunbuk köl

\* 15:11: Sum 117.1 \* 15:12: Ais 11.10



gulim engizal. Anutunöŋ kalem möriam niŋgiiga miangö qakŋe kinjalangöra mönö awösamkakak qakŋe keu köhöikŋi tosatŋi ohom engizal.

<sup>16</sup> Miangö könaŋi kewö: Anutunöŋ kian kantri eŋön uruŋini melengetka Uŋa Töröŋan mem sarahim engimapköra mörakza. Mutuk jöwöwöl ohogetka köwakŋan öŋgöi Anutunöŋ söŋgaizapma, miangö dop nalö kewöŋe Anutunöŋ ambazip gölme dop buŋaŋi aketka eŋgeka söŋgaimangöra awöweŋgömakza. Miangöra Ölöwak Buŋaŋi kantri tosatŋi yeŋgö sutŋine jim sehimangö jiba nupŋi qakne aliga miangö dop urugö nup galöm aka Kraist Jisösgö welenŋi qemakzal.

<sup>17</sup> Miangöra Kraist Jisösbuk qekötahöba kinda Anutugö nupŋi membiga qetbuŋa niŋgiiga sileni memba öŋgöba awösamkakak kinjal. <sup>18</sup> Kraistnöŋ kantri tosatŋi yeŋön Anutugö jitŋi tem kölmegöra möta sölölohöba kuŋgum niŋgimazawi, miangön mönö nam köl niŋgiiga keuni jiba ahakmemeni ahakzal. Keu tosatŋi laŋ jim sehisehigö awösamkakakŋi mi qahö ahöm niŋgiza.

<sup>19</sup> Uŋa Töröŋangö ösumŋan mönö nam köl niŋgiiga aŋgöletot aiwesök kukösumŋinambuk asuhuget. Nöŋön Jerusalem siti mosöta kantriŋi kantriŋi liliköba anda mala mala Yuropkö siti qetŋi Iirikum miangöreŋ aŋgoral. Mewö gölme dop liliköba Kraistkö Ölöwak Buŋa mi jim asarim eŋgim teköyal. <sup>20</sup> Kunöŋ tandö kuŋguiga kuŋŋan kaba nanŋi miriŋi miangö qakŋe memba mönö keuŋambuk akŋa. Miangö dop kunöŋ Kraistkö keuŋan mötnaripkö tandö lök kuŋgui kinöhi, nöŋön mönö kaba yaŋgö tandö qakŋe töndangöba

kinda uruḡini toroqeba möhamgöba mem köhöim enḡimamgö tököba malal. Uruḡo nup mutukḡi memba mianḡön aködamuni miwikḡaimamgö kapaḡ köla malal. Mianḡöra ambazip denike yeḡön Kraistkö qetḡi qahö möta tönpin malgeri, nöḡön Ölöwak Buḡa yeḡöra jim asarimamgö awöweḡöba malal. <sup>21</sup> \*Mianḡö keuḡi Buḡa Kimbinöḡ kewö ohoget ahöza,  
 “Denike yeḡön keuḡi qahö jiget mötkeri, yeḡön mönö mala i ekḡe. Denike yeḡön könäḡi mutuk qahö möta tönpin malgeri, yeḡön mönö mala mi möt asarime.”

<sup>22</sup> \*Nup mewöḡan jöhöm niḡiyöhaḡöra mönö nalö dop enḡöreḡ kamamgö osiba malal. Mewö.

*Polnöḡ Rom anmamgö areḡi alök.*

<sup>23</sup> Mewö malalmö, liliköba urukunḡukunḡu nup mutukḡi memba gölme pakpak möt enḡizini, mianḡöreḡ mi mem teköba malal. Uruḡo nup mutukḡi memamamgö gölmeḡi mi nalö kewöḡe kunbuk qahö ahöza. Mewöyök iḡini enḡekḡamgö sihimḡi möta malbiga yambu (yara) gwötpuk lök teköyök. <sup>24</sup> Mianḡöra kantri qetḡi Spein anmami, mianḡö könäḡe mönö enḡöreḡ kamamgö areḡi ala enḡekḡamgö jörömqöröm aka kewö mötzal: Enḡeka embuk sösongai aka borom kun köisirik tatpiga bauköm niḡigetka ölop köna toroqeba Spein anmam.

<sup>25</sup> \*Mewö mötzalmö, nalö kewöḡe Jerusalem sitigö könagesö sarakḡi naḡöm enḡibingöra mianḡöreḡ anmam. Mianḡöreḡ andagun enḡöreḡ

---

\* 15:21: Ais 52.15    \* 15:22: Rom 1.13    \* 15:25: 1 Kor 16.1-4

kamam. <sup>26</sup> Masedonia aka Akaia prowins yahöt mietkö urumelen könagesö kambuñi kambuñi yeñön mönö Jerusalem sitigö ambazip sarakñi bauköm engbingö keu jöhöget. Anutugö ambazip sarakñi wanapñi maljei, mönö yengöra keu jöhöba naluk gwötpuk ketani ala mindirigetka mi membagun anda engimam.

<sup>27</sup> \*Mewö akingö uru sösöngai möta keu jöhöba mindimindiri naluk ketani mi alget. Mewö almegö tosa ahöm engiiga algetka ölña dop kölja. Anutunöñ Juda könagesö kötuetköm nengimangö keuñi jii ahöiga kötumötuet mianjön kian kantriñi kantriñi dop köla qakñine öngöi malje. Miangöra kian kantri yengören tosa ahöiga likepñi melenða kalemñinan Juda könagesögö wanapñi bauköm engigetka dop kölja. <sup>28</sup> Nöñön kalem mi memba anda böröñine albi nupni mianjön teköiga miangö andöñe engömosöta kusukñanök engören kaba engekagun toroqeba Spein anmam. <sup>29</sup> Engören kamami, nalö miangören mönö Kraistkö kötumötuetñi mi körek memba kaba engimam. Mewö möt yaközal.

<sup>30</sup> O urumelen alaurupni, nöñön Kembu Jisös Kraistpuk gekötahöba kinda kewö uru kuñgum engizal: Uña Töröñan jöpaköba nangöm engimakzawangö dop mönö nöngöra Anutu köuluköba malme. Aum-mörimakzali, miangören mönö uruka-lemñinan bauköm niñgiba malme.

<sup>31</sup> Judia prowinsnöñ anda ambazip Kraistköra yangisen ahakzei, yengö böröñine gebilenbuköra mönö Anutugö köulukögetka sel jöhöm niñgibawak.

---

\* 15:27: 1 Kor 9.11

Mewöyök naluk kalem ketanji memba Jerusalem anda ambazip saraknji yengö böröjine albiga dop köli sihimnji mötmegöra mönö köuluköba malme. <sup>32</sup> Mewö köulukö-getka Anutunöj sihimnji mötza ewö, nöjön mönö sösöngai qakne engören kaba embuk köisirik tata körö-ölöwak qem ningigetka malmam. <sup>33</sup> Luai Tonji Anutu yanjon mönö körek embuk kinma. Keu mi ölña.

## 16

### *Yaizözkök keu teteköni*

<sup>1</sup> Alanini Fibi (Foibe) yanjon Senkria urumelen könagesögö nup meme ambia akza. Yanjon Rom engören kamawi, i köyan kölmegöra mönö qesim engiba böröjine aljal. <sup>2</sup> Yanjon ambazip gwötpuk aka ni mewöyök bauköm nengiba malök. Miangöra Anutugö ambazip sarakjan alaurupnini köl öröm engimakzini, miangö dop Fabinöj kaiga i mönö Kembangö qetne köuluköba köl öröm wangime. Engören kaba yuai kungöra osibawak, miangören mönö bauköm wangime.

<sup>3</sup>\* Awanömyahöt Prisila aka Aqila Kraist Jisösbuk kinjahori, neñakyahötni yetköra mönö nöngören yaizözkökni jigetka mötmahot. <sup>4</sup> Yetkön mönö nöngöra aka malmalñiri kölenja kömumbitkö ahot. Nöjönök qahö möpöseim etkizalmö, kantri tosatne urumelen könagesö kambunji kambunji yanjon mönö mewöyök yetköra saiwap jimakze.

<sup>5</sup> Urumelen könagesö mirinire tokomakzei, yengöra mewöyök mönö nöngö yaizözkökni jigetka mötme. Eisia prowinsnöj nup membiga ölñi

---

\* 16:3: Apo 18.2

mutukņan asuhuiga Epainetus yaņon uruņi melenċa Kraistkō buņa ahōhi, wōlbōt alani yaņgōra mōnō nōņgōreņ yaizōkzōkni jigetka mōtma. <sup>6</sup> Marianōņ eņgōra aka nup ketañi memba malōhi, yaņgōra mōnō nōņgōreņ yaizōkzōkni jigetka mōtma. <sup>7</sup> Andronikus aka Junias tinitosolomyahōtni yetkōn mutuk Kraistkōreņ qekōtahōyohotka nōņon yetkō andōņire uruni melenċbiga miangō andōņe nōmbuk kōsō mire malin. Aposol yeņon yetkōra mōtketka sutņine oņgōņgōņi akzahot. Yetkōra mōnō nōņgōreņ yaizōkzōkni jigetka mōtmahot.

<sup>8</sup> Wōlbōt alani Ampliatus Kembubuk kinjawi, yaņgōra mōnō nōņgōreņ yaizōkzōkni jigetka mōtma. <sup>9</sup> Neņaknini Urbanus Kraistpuk kinjawi aka wōlbōt alani Stakis yetkōra mōnō nōņgōreņ yaizōkzōkni jigetka mōtmahot. <sup>10</sup> Apeles Anutunōņ esapesap waņgiiga dop kōli Kraistpuk qekōtahōba kinjawi, yaņgōra mōnō nōņgō yaizōkzōkni jigetka mōtma. Aristobulusbuk miri mohot maljei, yeņgōra mōnō nōņgōreņ yaizōkzōkni jigetka mōtme. <sup>11</sup> Tinitosolomni Herodion yaņgōra mōnō nōņgōreņ yaizōkzōkni jigetka mōtma. Narsisusbuk Kembu qekōtahōba miri mohot maljei, yeņgōra mōnō nōņgōreņ yaizōkzōkni jigetka mōtme.

<sup>12</sup> Trifina aka Trifosa ambi yahōt mietkōn nup ketañi memba Kembubuk kinjahori, yetkōra mōnō nōņgōreņ yaizōkzōkni jigetka mōtmahot. Wōlbōt ambi alani Persis yaņon Kembugōra nup keta bōlōkņi memba maljawi, yaņgōra mōnō nōņgōreņ yaizōkzōkni jigetka mōtma. <sup>13</sup> \*Rufus

---

\* **16:13:** Mak 15.21

yañön Kembangö nupñi ölop kötökñi memakzawi aka yañgö namñi nalö dop ni tok nahönñi ewö köyan köl ningiba malöhi, yetköra mönö nönğöreñ yaizözkökni jigetka mötmahot.

<sup>14</sup> Asinkritus, Flegon, Hermes, Patrobas, Hermas aka urumelen alaurup tosatñi yembuk maljei, yeñgöra mönö nönğö yaizözkökni jigetka mötme. <sup>15</sup> Filologus, Julia, Nereus nenñambuk aka Olimpas aka ambazip sarakñi tosatñi pakpak yembuk maljei, yeñgöra mönö nönğöreñ yaizözkökni jigetka mötme.

<sup>16</sup> Urumelen alaurup sutñine mönö anğum anğuba nemböñini suhuba jölöñini jiba malme. Kraistkö urumelen könagesö pakpak yeñön mönö yaizözkökñini algetka engöreñ kaza. Mewö.

### *Qambañ keu teteköñi*

<sup>17</sup> O urumelen alaurupni, nönön uruñini kewö kuñguba jizal: Ambazip tosatñan uru mendenmenden asuhumapkö nam kölakzei, yeñgöra mönö je galöm mem anğuba malme. Urumohotkö silik ölopñi kusum engigetka mötze, keu mi qetala kösawörañ keu tosatñi mianön uruñini kuñgugetka bölii qaköba erakze. Ambazip mewöñi mi mönö engömosöta tikep malme. <sup>18</sup> Ambazip mewöñan mönö nanini Kembunini Kraistkö nupñi qahö memakzemö, nanñini sihimñinangö dop asuhumapköra tuaköpek jiba nanñini welen qem anğumakze. Kelök keu ölopñi ölopñi nahömnambuk jiba ambazip geñmoñini qahö yeñgö uruñini kuñguba tilipköm engimakze.

19 Injini Ölöwak Buña tem köla wuatangömakzei, keu mi körek nenjö kezapnine geiga mötzin. Mianğöra nönön engöra aka önöñi qahö söngaimakzal. Mewö akzalmö, injini kewö aka malmegöra mötzal: Mönö bölöñi akingö mötkutukutuñini mosötketka etma. Ölöpñi akingö mötkutukutuñini mi mönö pöndañ köl guliba mem qarime. 20 Luai Toñi Anutu yañön mönö Satan ösumok töjöjahöi engö bapñine eri köirañ köla söngaiba malme.

Kembunini Jisösgö kalem möriamñan mönö embuk ahöma.

21 \*Nönjö nenakni Timoti yañön mönö yaizözkökñi ali engöreñ kaza. Nönjö tinitosolomurupni Lusius, Jeison aka Sosipater yeñön mewöyök yaizözkökñini algetka engöreñ kaza.

22 Tertius nönön Polgö keuñi möta kimbi ki ohozali, nönön mewöyök Kembubuk kinda yaizözkökni albiga engöreñ kaza.

23 \*Gaiusnön miriñi jim teköi malbiga urumelen könagesö pakpak yeñön mewöyök ki kaba tokogetka nene köisirik al nenjimakzawi, yañön mönö yaizözkökñi aliga engöreñ kaza. Erastus yañön siti pomñangö ofis uruñe takis monen galöm kölakzawi aka urumelen alanini Qartus yetkөн mönö yaizözkökñiri alohotka engöreñ kaza.

24 Kembunini Jisös Kraistkö kalem möriamñan mönö embuk ahöma. Keu mi ölña.

*Kembu möpöseiba kewö köulukömakzal:*

---

\* 16:21: Apo 16.1      \* 16:23: Apo 19.29; 1 Kor 1.14; 2 Tim 4.20

<sup>25</sup> Ölöwak Buᶇa keu ölni mi möpᶇaᶇgö möpᶇeyök mala kotketka miangören ᶇölapᶇe ahöyök. Mewö ahöiga Jisösnöᶇ eta indela jim asariiga möta jim sehimakzal. Buᶇa keu miangö dop Anutunöᶇ mönö köhöiba mötnariᶇini mem köhöiiga ölop zeᶇ kin köhöime. Miangöra neᶇön mönö Anutugö qet-buᶇaᶇi möpöseininga sehimakᶇa.

<sup>26</sup> Mutuk Buᶇa keu ölnan asa-asambötᶇe ahöba korökmö, nalö kewöᶇe kezapqetok ambazip kulem ohoget ahözawaᶇgö dop mönö aukᶇe asuhuyök. Anutunöᶇ nalö dop mala kota teteköᶇi qahö mal öᶇgömawi, yaᶇön ambazip kambuᶇi kambuᶇi neᶇön urunini melenᶇa Buᶇa keu möt nariba tem köla malbingöra mötza. Miangöra nup kewö membingö jim kutum neᶇgiyök, “Inini mönö anda gölme dop liliköba Buᶇa keu jim asariba malme.” Keu miangö dop neᶇön Buᶇa keu mi ambazip kambu pakpak mötmegöra jim asariba malin.

<sup>27</sup> Anutu nanᶇök mötkutukutu Toᶇi akzawi, neᶇön mönö Jisös Kraistkö qetᶇe yaᶇgö qetbuᶇaᶇi möpöseininga nalö teteköᶇi qahö aködamunᶇambuk ahöm öᶇgöba ahöma. Keu mi ölna.



**Burum-Mindik Bible**  
**The New Testament and portions of the Old Testament**  
**in the Somba-Siawari language of Papua New Guinea,**  
**also called the Burum Mindik language.**  
**Sampela hap Buk Baibel long tokples Burum Mindik**  
**long Niugini**

Copyright © 1992, 2002 The Bible Society of Papua New Guinea

Language: Burum-Mindik or Somba-Siawari (Somba-Siawari or Burum-Mindik)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-22

---

PDF generated using Haiola and XeLaTeX on 3 Mar 2023 from source files dated 9 Oct 2020

c0871260-68cc-5a50-953f-52200e105d1e